

ROMVLI AMASAEI

ORATIO

HABITA IN FVNERE

PAVLI. III. PONT. MAX.



COMPTON'S

O R A T I O

IN FIVE

THE FIVE

ALEXANDRO FARNESIO

S. R. E. CARDINALI

VICECANCELLARIO

POMPILIUS AMASÆVS

S. P. D.

ECREVERAM post Romuli Amasæi
patris mei obitum, omnes eius lucu-
brationes, quas nōdum in lucem edi-
tas ac multas quidem reliquit, primo
quoque tempore diuulgare: Cum of-
ficii mei ac pietatis esse ducerem, eius qui mihi uitæ
huius lucisq: autor fuisset, memoriam in hominum
animis renouare, quauē maxime possem ratione fa-
mæ perpetuitati consulere: Tum etiam quod me
non parum adiumenti Latine linguæ ac eloquentiæ
studiosis, cuius nō mediocrem is inter æquales suos
omnium consensu, tam in scribendo, quam ex tem-
pore loquēdo laudem consecutus fuerat, allaturū
sperabam: si minime contemnenda quæ ad imitan-
dum, sibi ex nostri temporis usu proponerent, cum
ipsis illarum facultatū exemplaria communicarem.
Quapropter quicquid hætenus à multis uariisque
occupationib. mihi succisui temporis fuit, totum id
partim in propriis quibusdam commentationibus

a ii meis

meis ad studioforum itidem utilitatē, partim in patris ipsius lucubrationib. recensendis, ad certumque ordinem redigendis consumpsi. Quod sane opus difficile perplexumque fuit. Erant enim ex (quod homo assidue præter interiora studia sua, docendique munus, plurimis fuerat publicis negociis Bononiæ primum, deinde Romæ districtus) obscurius confusiusque scriptæ. Itaque mihi, utpote qui eius & scribendi, & scripta etiam sua emendandi, liturisque obducendi totam rationem noram, ut eas librariis, uel impressorib. explicatiores dilucidioresque traderem, propria fuerunt manu describendæ. Quod cum absoluissem, statueram omnes in unum idemque uolumen coniectas, ac simul iunctas & connexas impressorum typis excudendas curare. Verum ab hac me opinione amici complures remouerunt: Cum dicerent, lentum id longiorisque temporis negocium fore, ac diuturniorem hominum expectationem de operis ipsius gratia non parum detracturam. Satis adhuc & plus etiam quam oportuisset, moræ interiectum. Se uero mihi suadere, ut ab eo potissimum libro, qui omnium ipsius absolutissimus ornatissimusque uideretur, ordiretur: Tum deinceps alios atque alios subiungerem. Hinc futurum, ut diuersarum & crebriorum editionum nouitate maiorem in dies ab elegantib. literatisque hominibus gratiam inirem.

Mouit

Mouit me cum amicorum autoritas, tum ipsa etiam ratio, ac eorum sententiæ mihi omnino parendum censui. Subiit uero mentem patris consilium, de oratione quamprimum publicanda, quam in PAVLI .III. PONT. MAX. funere habuerat, posteaque (ut perpetuo pie, sancteque illius præclarissimi principis memoriam colebat, seduloque tuam sibi gratiam demereri studebat) summa diligentia expolierat. Quod cum præueniens mors irritum reddidisset, id me superstitem iam exequi, ac nihil mihi antiquius esse debere censui, quam ut oratio simulatque hoc perficiendi facultas oblata esset, tui perillustri nominis munita protectaque autoritate appareret. Atque ad id quidem posteaquam consilium cum illis meum communicauim, laudationemque inspiciendi copiam eis feci, assiduos hortatores habui, amplissimos homines eosdemque clientes tuos, Antonium Aelium, Michaellem Turrium, Antonium Bernardum, Io. Antonium Fachinetum, Thomam Liliū, quos omnes Pontificii honoris, uitæ integritatis, præstantisque doctrinæ causa nomino, Cumque his Io. Angelum Papium, clarissimum celeberrimæque per omnem Europam famæ legum interpretem, Quem uere Oratorum Iuris peritissimum, Iuris autem peritorum eloquentissimum nostra hæc ætas appellarit. Tum uero Camillum Palæotum & Franciscum


ciscum Bolognetum Bononiæ Senatores, ambos exi-
mia probitate, morum elegantia & eruditione in-
signes: Qui etiam olim una mecum, à Romulo pa-
tre Pausaniam edendi sibi munus depoposcerunt,
imprimendumq: curarunt. Orationem hanc igitur
de illius plane diuini principis, tuis met ipsius, to-
tiusque præcellæ familiæ tuæ uerissimis laudibus, hi-
storica potius fide, quam laudationis ritu comme-
moratis, fœlicissimis auspiciis tuis in uulgus profe-
ro, eandemque amplitudini tuæ in manus dedo &
dedico: fidei tutelæq: tuæ commendo. Decet enim
tibi olim orationis ipsius auctoris, nunc superstitum
filiorum, domusque ac fortunarum nostrarum Pa-
trono munus illud offerre, quod tuum ueluti Præ-
dium ad FARNESIÆ gentis gloriam decusq: pro-
tulit: Cui & Romulum ipsum, & Romuli prolem
perpetuo præcipueq: inseruire uoluisse, & id ipsum,
& alia literarum monumenta, quæ propediem ex lu-
cubrationum nostrarum quasi penu in lucem
fauente DEO depromentur, ut præsen-
tibus posterisq: fidem faciant, fore
confido. Vale Amplissime be-
nignissimeque Patro-
ne diu fœlix.

BONONIA. VIII. Kal. Decembr.

M D L X I I I.

Handwritten text, likely a letter or document, written in a cursive script. The text is mostly illegible due to extreme fading and blurring. It appears to be a formal communication, possibly a letter of introduction or a business document, given the structure and the use of capital letters at the beginning of lines.

Handwritten signature or initials in the bottom right corner, possibly reading "John" or "John D."



ROMVLI AMASAEI ORATIO

HABITA IN FVNERE

PAVLI. III. PONT. MAX.

V

ESTRVM uos quidem PATRES
AMPLISSIMI amorem, obseruan-
tiam, pietatem erga PAVLVM. III.,
PONT. MAX. multis, ac maxi-
me perspicuis documentis hodierno die
facile declarastis: neq: enim mutata so-
lum ueste, sed uultus etiam, atq: oculorum insolita tristitia, lugu-
bri silentio, atq: omni uehementer affecti animi significatione, quo
maerore, quo desiderio optimi, ac Sanctissimi parentis uestri obi-
tum prosequamini: Quamque dolenter & acerbe hanc Reip. or-
bitatem feratis omnibus qui religiosissimam tanti funeris pompā
celebraturi in hanc basilicam conuenerunt, testatum ut esset ef-
fecistis. Ego uero, cui uos nominatim hoc munus detulistis, ne pa-
rum omnino digna tam apparatis exequiis laudatio mea uideri
possit, magnopere uereor: Nō paruis enim me, aut leuibus oppres-
sum atq: implicitum difficultatibus sentio. Nam si PAVLI
FARNESII unius maximi, & sapientissimi post hominum
memoriam Pontificis laudes omnes coner dicendo complecti, atq:

A

exor-

exornare, multo quam opus foret longior, & ingentibus, quibus in presentia uestrum prope obruitur collegium, occupationibus minime apta cōtinget oratio. Sin ad compendium breuitati seruiens maximarum rerum ueluti aceruum redigam, non grauitur, & copioso uti decuit PAVLVM laudasse, sed cum rudi & ieiuno commentario in hanc tantæ amplitudinis lucem parum pudenter prodiiſſe uisus fuero. Illud præterea me uehementer sollicitum habet, quod confecto iam annis corpore, fracto atq; afflicto recenti dolore ob mei Principis, mei optimi atq; humanissimi parentis interitum animo, dicendi facultate uestrarum Patres auriū & animorum uel attentionem, uel patientiam me promeriturum ne sperare quidem audeo. Iam uero quo ingenii, quo memoria, quo spiritus ac uocis conatu uestre Farnesii procures tanto aucto dignissimi Nepotes, tuæq; in primis ALEXANDER cuius ego auctoritate & impulsu hoc in loco quicquid habeo estimationis, periclitari audere coactus sum, de me expectationi respondebo? Cuiusq; mihi rei non omnino nulla est ratio habēda, Qua nam ego PAULE Pater optime ac sanctissime, memoris gratiq; animi declaratione, suauissimis, quibus me, quoties ad te ueniebam, cum certissima tue erga me uoluntatis testificatione uerbis alloquebare, ac simul perueteri iam mee in te colendo, atq; oris numinisq; tui maiestate adorāda pietati satisfaciam? Verū quoniam quod mihi tam præter opinionem meam impositum est onus, neq; deprecari, neq; deponere, neq; in alias tam dignitate, quam dicēdi exercitatione Illustres personas reuicere licitum fuit, quod semel suscepi, aut uestra fretus Patres benignitate constanter

ter perferam aut succumbendum si fuerit, planum certe omnibus faciam, non animi mihi ut in tanto publico ac priuato luctu alacritatem, sed ob ingentem rei magnitudinem, mentis atq. ingenii firmitatem defuisse. Magnæ existunt, & graues quoties è uita Pont. max. excedere contigerit, publici luctus causæ, quod nempe populi omnes, qui in eius fide, atq. officio fuerunt, sibi communem parentem ereptum intelligunt: Ac ne tota Resp. quasi nauis gubernatore amisso, uiolentis agitetur tempestatibus, cum maximo naufragii periculo metuunt. Quo uero plures, & maiores in eo uirtutes enituerint, quantoq. fuerint Illustriora in commendatas fidei suæ ciuitates merita, eo tanquam salutari quodam lumine orbati, & anguntur acerbius, & luctus minuendi uix rationem ullam queunt satis efficacem, aut idoneam reperire. Ubi igitur primum de Pont. Max. obitu nuntius cæperit percrebescere, passim subitæ cuiusdam trepidationis, gentes & populi certissimas dare significationes consueuerunt. Lugent ciuitatum ordines: Squallent oppida: Moenia, & agri propemodum ipsi, desiderio & moerore consenescent. Tanti ego ac tam iusti doloris causam huic funebri urbis iustitio subesse facile ostendā, si quæ ad PAV-
LI uitam exornandam, atq. illustrandam summus & præpotens Deus, natura & fortuna Dei administræ congesserint bona, aut enumerare, aut certe summatim perstringere potuero. Sic enim fiet, ut quam gaudenti animo illis paulo ante fruebamur, tã nunc esse nobis tanta uirtute, tantaq. diuini illius uiri sapientia, tamq. innumerabilibus laudibus carendum, grauius ac pene impatienter feramus. Sed quisnam erit laudationis exorsus? Eius

Patria.

primas iure sibi patria vindicat. In ea enim primum nostrum quilibet vitalem haurit spiritum: In ea, in quo moveatur, in quo quiescat solum nanciscitur: In ea alitur, educatur, instituitur: Magna autem refert tum ad res gerendas, tum ad gestarum gloriam comparandam, quæ cui Patria obtigerit: In ea uero urbe natus est PAVLVS, uel ALEXANDER potius (hoc enim primum a parentibus appellatum fuisse nomine scimus omnes) in qua si patriam sibi quisque optare posset, ecquis quam in alia quauis nasci non mallet? Romæ nempe, quæ cum maiestatis, & gloriæ semper domicilium fuerit, fidelissimus omnium nationum, & populorum portus, Augustissima sociorum ara, Coniunctæ cum imperio firmissima religionis sedes, Totius denique orbis terrarum instar, & urbis una in toto terrarum orbe indefinito digna nomine. Quæque ut olim ab aliis atque aliis & condita est, & amplificata gentibus, sic hospitali ipsa (ut ita dixerim) complexu, ex omnibus terris conuenas recipit, nullique hominum insensa nouitati suæ omnibus in quibus modo uirtutis aliquis splendor eluceat, gratiæ, ac benignitatem impertit. Quod si non ab hac, a qua tandem quis patria nomen et decus accipiet? Sed quam bene, & præclare cum Paulo actum est, qui non plus fere accepit ad famæ celebritatem, quam patriæ dederit? In posterum enim omne tempus nunquam satis plene, satis ornate poterit Urbs laudari, quin magnus, & admirabilis quidam ad eius laudes sit cumulus accessurus. Quod in ea Paulus. III. Pont. Max. primum lucem aspexerit. O felice eius ciuis, atque alumni accessione Roma, qui in omni ueteris memorie commemoratione, cum optimis quibusque, & maxime laudatis.

tis Romanis Principibus, ac Pontificibus maximis conferri, mul-
 tis anteferri, nemini poterit postponi. Itaque ut generis obscuri-
 tas, ac novitas infringit hominum animos ac debilitat: Sic ad co-
 gitationum sublimitatem, & magnarum rerum molitionem uelu-
 ti quandam proficit nobilitas. Atqui non clari tantum in Far-
 nesiâ gente Pauli maiores fuerunt, sed beati opibus, ac plurimum
 oppidorum perpetua ditione potentes, neque Romanorum tantum.
 Procerum nomine nobilitati, sed ob res fortiter ac strenue gestas,
 in eos etiam, qui de rebus Italicis conscripti sunt, comme itarios,
 atque annales magna cum laude relati. Nam ut abolitum iam fe-
 re uetustate magnum imaginum numerum præterea fuit ex hac
 gente abhinc annos ferme. CCC. Petrus Farnesius qui Imperator
 cum summa potestate iustos exercitus ducens, in magna bellorum
 uarietate insignibus claruit uictoriis: Idemque cum Florentinorum
 copiis præfesset, in Pisarum oppugnatione, confosso ab hostibus
 equo, mulo inuectus, conseruata pristina animi præsentia, per me-
 dias manium ruinas irrupit: Consecutaque mox suorum multitu-
 dine, subito impetu captam & expugnatam urbem Florentinæ
 Reip. tradidit. Fuit Paternus Pauli auus Ranutius, qui Euge-
 nio. VIII. Pont. Max. periculosis temporibus, scissa in
 diuersas partes Repub. fortem ac fidelem Reip. uestræ operam
 exercitus Imperator nauauit: Quique Alfonsi Neapolitano-
 rum Regis exercitus ingenti cum gloria rexit. Non possum sine
 impie quodam modo obliuionis nota Petrum Farnesium An-
 caranium cognomento, clarum illum quidem in diuerso genere
 laudis, & summa nominis celebritate uirum prætermittere, qui
 cum

Genus

Maiores

cum luculentas sibi fortunas ex iuris ciuilis interpretatione comparasset, domum & prædia Bononiæ reliquit, unde literatæ iuuentutis collegium, quod adhuc ex ipsius testamento ad Farnesie gentis tutelam pertinet, aleretur. Patre gentis est Petro Ludouico, spectata fide atq; officio in Romanam Remp. viro. Verum non minus clarum, aut Illustre fuit Maternum genus. Letissima enim Foemina Ioanna Mater eius è Caietana fuit gente, non solum prisca, sed etiam nobilissima. Ex ea certe Bonifacium octauum Pont. Max. fuisse constat, cuius multa, ac præceteræ laudes literarum sunt monimentis mandata. Pauli igitur alterum genus Imperatorium, alterum Pontificium. Iam uero ut generosarum Stirpium in seraci solo propagata semina, ad optimam frugem facile proficiunt, sic paterna & auita præstantes nobilitate animi, si bene, atq; ingenue educentur, ad egregiam se laudis spem celeriter efferunt, & corroborant. Et his quidem maioribus ac Parentibus ortus Alexander (cui rei plurimum amplissimæ fortunæ obsecundarunt) à puero liberalissime educus, atq; institutus est. Nam cum ab ipsis prope incunabulis, & eximie indolis ac diuini prope ingenii certissimum specimen daret, immensoq; literarum amore flagraret, & domesticos exqui

Pater

Mater

Educatio

Doctores sitæ eruditionis magistros habuit: & iam puer Pomponium letum Romani tunc Academiæ principem audiuit assidue, & obseruantissime coluit. Tantos adolescentulus in optimarum artium studiis processus effecerat, ut qui longo iuuallo æquales omnes suos superasset, multo maioribus natu merito par esse uideretur, cum clarissimorum in omni liberalium disciplinarum genere hominum

minum fama allectus, Ficini, Politiani, Chalcondyle, Lascaris, ad eos se Florentiam contulit. Quo tempore, & eum Pico Mirandulano admirabilis ingeni, & incredibilis doctrinae adolescente: Et cum Ioanne Medice, qui Leo postea fuit. x. cotidianus ei fuit usus, ac familiaritas, & suauissima in communibus maximarum artium studii emulatio. In Patriam inde reuersus, cum latinæ Græcæq; linguæ cognitione, atq; iis omnibus disciplinis, è quibus constat pulcherrimus humanitatis orbis, omni prorsus ex parte esset perpolitus, Ad publicos iam honores aggressus, scriptum primum inter sanctiores scribas, qui Apostolici vocantur, fecit: Quo sane munere perite ac diligenter fungens, summaque, quam semper retinuit, tam manus quam styli elegantia, egregie cum ciuibus, tum peregrinis omnibus carus esse cepit, multasq; ac minime uulgares laudes est consecutus. In Farnesio itaq; quod quisq; (uti fit) in eo cum admiratione adamarat, aliis probitatem, humanitatem, facilitatem, pudorem, aliis modestiam, liberalitatem, exactam aliis utriusq; linguæ coniunctā cum multiplici doctrina & mirifica ingenii celeritate peritiam, omnibus uero omnia collaudantibus, tam multarū, tamq; spectatarū uirtutum fama impulsus Alexander. VI. Borgius Pont. Max. eum Protonotariū primum superioris loci titulo honestauit: Mox Pontificatu Montis Phaliscorum, & castri Inui decoratū, cum annum ageret duodetricesimum, magno Patrum consensu in sacrosanctum adlegit Cardinalium collegium: Alla supremo proxima apici insignia quam sibi merito delata fuisse probarit, dum eadem, qua perpetuo me uti oportere intelligo, dicendi bre-

Honores
publici

Cardina-
lium crea-
tus

uitate

uitate commemoro me Patres, quæso, libenter & benigne, uti adhuc fecistis, auscultate. Primum omnium tanto sublimiori honoris gradu nihil elatus, uirtutes duas specie dispares, grauitatem cum comitate, prudentia ita coniunxit, ut dignitatem suam semper retinuerit, & mira quadam morum facilitate amabilem se omnibus, & gratiosum præbuerit: Pont. dicto uti optime de se meriti parentis ita audiens fuit, ut alius nemo magis: libertatem tamen in dicendis sententiis nullius cuiusquam beneficio deuinctam esse debere putauit. Consilio, auctoritate, gratia, graui, & ornato orationis genere cum cæteris antecelleret, quicquid tamen aut agendo, aut dicendo perfecisset, amice ac beneuole cum suis collegis communicabat. Legari in provincias extra ordinem solent è uestro Patres collegio, qui prudentia, qui rerum usu & auctoritate, belli pacisq; munia sustinere posse uideantur. Alexander non ita multo postquam Cardinalis esse cæperat, propter excellentem, & iam spectatam ingenii consiliiq; magnitudinem dignus est habitus, qui maximis legationibus fungeretur. Nam & Carolo .VIII. Gallorum Regi per ea tempora cum exercitu Neapolim contendenti obuiam missus est: Et legatus Picenum, legatus Umbriam obtinuit. At enim Magistratus capeffere, etsi per honorificum est, cum præsertim non cupide appetentibus, sed officiose accipientibus decernuntur: Quanto tamen est præclarius ita se in magistratibus gessisse, ut nihil cuiquam ad calumniandum loci relictum fuerit, laudum materiam non facile quouis dicendo assequi possit? Ea fuit Alexander in Populos aditus facilitate, ea affabilitate, ea in iure dicendo æquitate, ea postre

Legatio-
nes

mo in factionum dissidiis tollendis, in redigendis in ordinem potentioribus, in Ciuitatum incommodis propulsandis, priuatorum miseriis subleuandis providentia: ut cum nulli uideri posset ordini indulgentior, æque tamen summis, & infimis esset iucundissimus. In publicis negotiis semper gravis, In priuata consuetudine & conuictu festiuus ac perurbanus. De suo magnificus ac liberalis. Alieni non modo non profusus, sed neq; etiam appetens. Non ad speciem hæc dicuntur: Sed quod laudationis ueritas postulat, non prætermittuntur: atq; eo recensentur fidentius, quod apud uos Patres, quibus cum ille amanter & familiariter uixit, hæc habetur oratio. Neque uero his ille uirtutibus uni se Alexandro. VI. commendauit: Sed Iulii etiam, Pii, Leonis, Hadriani, Clementis postremo sibi est iudicia promeritus, atq; adeo ut eorum quilibet de eo quam optime merendi, præcipuam quandam & perpetuam curam ac sollicitudinem præ se tulerit. Neq; uero Alexander illis uoluntatem suam, officia, studia minus præstitit, quam si eorum cuiuslibet dignitatem, fortunamq; suas omnes acceptas referre debuisset. Quare nemo ex illis fuit, cuius secretioribus consiliis omnibus non intimus fuerit ac familiarissimus: Nemo prorsus, qui pro suo singulari quodam de eo iudicio, non ei omnia potissimum demandaret, quæ curâ atq; industria gerenda, consilio atq; animi magnitudine sustinenda forent. Inciderunt calamitosissima illa Clementis tempora, quorum meminisse horret animus. Ea cum Farnesius tanquam è specula prospiceret, imminens periculum nullo negotio deuitare, atq; in propinqua suæ diuisionis oppida, & decia, ei satis etiam munita se recipere potuisse.

Clementis
tempora.

B

Vrbem

Urbem tamen pro sua in Patriam pietate, in principem suum fi-
de sibi neuiquam deferendam censuit: Ea igitur capta illum in
arcem confugientem secutus, atq; ibi cum eo aliquandiu obsessus
est. Inde hostium concessu, ut ad Carolum Casarem in Hispani-
am traiceret, cum eòq; de pacis conditionibus ageret, emissus,
cum Lyguriae fines attigisset, de instructissimi Gallorum in Ita-
liam exercitus aduentu nuntium accepit, Parmam itaq; cuius Ci-
uitatis Pontifex erat, certa ductus ratione diuertit. Nam & pa-
catissima tunc ea fuit Ciuitas, & cum primis in uestrae, Patres,
Reip. fide, & officio constans, Alexandri uero ipsius multis &
magnis diuinita beneficia, quodque ille maximi pro sua ad be-
ne de quam plurimis merendum propensissima uoluntate estima-
bat, in ea certos, & laculentos fructus habebat, unde eiektorum
ex illa urbana procella posset miseras subleuare. Ad eum cum
aliquot Cardinales, qui e tanto euaserant, & ut ita dixerim,
onatarant naufragio, confugissent, eius maxime consilio & conso-
latione subnisi, non modo animos non desponderunt, sed ad ali-
quam etiam Pontificis Maximi, & Collegiarum suorum, qui in
Adriani mole inclusi atq; obsessi tenebantur, liberandi spem eri-
gi potuerunt. Quare cum hoc deliberationum omnium duce &
auctore inter illas profugas patrum reliquias de reliqua salutis
spe cotidie fere consultum fuisset, paucis post mensibus Clemens
recepta iam libertate, magnas Farnesio gratias habuit, quod in
summa rerum desperatione ad Reip. gubernacula, quae sibi de ma-
nibus turbulentissimae extorserant bellorum tempestates, ipse ul-
tro accurrisset, neq; Pontificiam quasi statione prius deseruisset,
quam

quam & Pontificem Max. ex illa se obsidione subtraxisse, cu-
 taque in urbe & pacata iam esse omnia compertum habuisset.
 Consecutus est biennio fere post, Caroli. V. Caesaris cum Pont.
 Max. congressus, cum ei Clemens imperii coronam Bononie de-
 tulit. Hunc qui aduentante Casarem pro Pontifice obuius acci-
 peret, delegit Clemens. Hunc summum & precipuum idem Cle-
 mens, & Carolus consiliorum omnium auctorem, hunc in stabi-
 lienda inter ipsos amicitia adiutorem, hunc habuerunt ad pacem
 inter Christianos Principes conficiendam, & ad suscipiendum
 atq: apparandum Turcicum bellum frequentem atq: assiduum
 hortatorem. Fuit iterum Clementi, cum uix à priore colloquio al-
 ter annus exisset, ad Caesaris congressus Bononiam redeundum.

Pontificis
et Caroli
Imperato-
ris cōgres-
sus pri-
mus.

Congres-
sus secun-
dus.

Diu tunc animi anceps fuit Clemens, Farnesium ne id enixe con-
 tendentibus Urbanis magistratibus, cunctisq: ciuibus, Urbi Le-
 gatum praeferret, an cuius opera & consilio, magnis arduisq: in
 rebus uteretur, secum duceret. Hic, qui Clementem audirent, non
 desuerunt, cum diceret, uideri sibi absente Farnesio consilia actio-
 nesq: suas omnes mancas atq: intermortuas fore: Quod tantum
 scilicet huic uni tribueret, ut sine eo non recte ac satis prouidenter
 consilium capi, Non grauitatq: ornate decerni. Non quae de-
 creta essent, mature ac constanter peragi, ac constitui posse puta-
 ret. Neq: senatus tantum principis absentiam a rationibus consi-
 liisq: suis, quam maxime alienam fore cogitatione complecteba-
 tur: Principem enim in collegio uestro locum multos iam annos
 Farnesius tenuerat, & ita tenuerat, ut ille in sedendo ac dicenda
 sententia primatus, non ei ex maiorum instituto iccirco obtingisse

uideri posset, quod esset in ordine antiquior, sed quod uite dignitate longo ceteros antecelleret) Verum non tam senatus Principem à se tunc intelligebat Clemens desideratum iri, quam spectata tam toties maximis in rebus, maximæ uiri fidem, grauitatem, constantiam, auctoritatem. Quo tempore ipse quoque Cæsar quam grauitè Farnesii absentiam laturus fuisset, non semel, ac minime quidem dubiis uocibus declarauit. O admirabilem Patres uirtutem, quam & præsentem amplissimi terrarum Principes præcipuis quibusdam honoribus dignam censuerint, & absentem certissimis communis desiderii testimoniis fuerint prosecuturi. Comitatus uero secundo etiam illo congressu Clementem Farnesius, egregiam Reip. operam nauauit. Atque in tanto quidem tunc fuit non solum apud collegas suos, sed apud Cæsare ipsam, & Cæsarianos omnes procures, honore, ut in eum intuentium uoces exceptæ sint, non debuisse, qui tantum uirtute & sapientia excelleret, ante senem, quam Pont. Max. fieri. Tantos adhuc fecerat Alexandri gloria cum uirtutum omnium meritis, tum consentienti hominum uoce incitata progressus, ut sublimius iam non posset, quam ad supremum honorum fastigium, & celsissimum dignitatis gradum subuolare. Aliquot inde post menses, Potentissimi Gallorum Regis rogatu, idem Pont. Max. Asianam classe profectus est, quo illum ut sequeretur Alexander, non grauate se tum eius, tum Regis precibus adduci sinisset. Sed quo minus tum principum optatis, tum suo perpetuo in Remp. studio satis tunc facere potuerit, fortuna aduersata est: quæ mox æquissima & faustissima futura, sue in eum acerbitalis breui illo

quidem

quidem. Sed uehementi impetu, totum, ut ita dicam, uirus profudit: Nam & non multo ante Hostia dum redit (Pontifex enim, uti scitis, Hostiæ fuit) euerfa, qua uehebatur naui, è Tyberinis uorticibus nix seruatum ac semianimum Urbi reddidit. Et non ita multo post graui & periculoso prope afflictum morbo, quin eum hominum expectationi eriperet, quam minimum absuit. Est uero Patres ita comparationem, ut quemadmodum in anni uarietate ac uicissitudine, nouæ quasi Cæli ac siderum conuersiones, è nouis temporum quæ uel solstitia, uel æquinoctia appellamus, trepident momentis: sic plerunque humane uitæ cursus, tanquam orbis quidam uehementiore motu, & grauiore quasi quodam cum sonitu conuertatur. Eo fit ut sepe, & secundissimas quasque res infidiosa illa, & nostris insensa prosperitatibus, quam Nemesis Græci Poetæ dixere, opprimat fortuna: & rursus acerbissimorum casuum importunitatem, letissimi atque optatissimi posterius temporis excipiant euentus. Quæ tam breuiter ac summatim, tam etiam celeriter Patres percurri, eiusmodi (nisi meum me fallit iudicium) sunt, ut Alexandrum præclaris omnibus antea uitæ rationibus comparatū, instructum atque ornatum ad Pontificatum Max. accessisse dubitari nihil omnino possit. Quis enim ad eius laudes cumulus accedere potuit: Cui patria urbs urbium omnium regina, & in ea perillustre ac omni dignitate & copiis affluens paternum & maternum genus obtigerit? Cuius admirabile ingenium, atque animi indolem, præclara adhibita institutio ac doctrina, omni uitæ elegantia, omni quæ latinis Græcisque literis continetur,

Epilogus
superio-
rum par-
tium.

cinetur, uirtutis, atque humanitatis genere excoluerit & perpo-
 huerit. Qui post aliquot publicos honores ingenti cum laude ge-
 stos, magno Patrum consensu in uestrum collegium fuerit coopta-
 tus: Qui pro Pontifice Italiae florentissimas praefecturas, scien-
 ter & cum summa iurisdictionis aequitate rexit: Neque sine
 ulla modo suspitione eas, quibus praefuit, Ciuitates gubernarit,
 sed iusti etiam moderatique imperii excimiam laudem una uniuers-
 forum Populorum uoce reportarit: Quem sex demceps Pontifi-
 ces Max. uirtutis atque optimarum artium merito carissimum
 habuerint: Quem sui collegae miseris & calamitosis temporibus
 patrem & patronum sibi extitisse senserint: Quem salutis cer-
 tum uindicem suae Resp. cognouerit: Quem Clemens. VII. &
 Carolus. V. primo secundoque itidem congressu coniunctionis in-
 ter ipsos confirmatorem & sequestrem, pacis constantissimum
 auctorem, pulcherrimarum actionum socium atque adiutorem
 amantissime exosculati fuerint: Quem postremo & à graui ua-
 letudine, & à fatali quodam periculo seruatum, & quasi è me-
 diis emersum heroicæ fortunæ fluctibus, urbi ac terrarum po-
 tius orbi Deus incolumem reddiderit: Ab hoc inquam homine,
 uel ut uerius dixerim, heroe, quidnam ex iis rebus omnibus abes-
 se potuit, quæ à tot tam laudabiliter, tantaque cum gloria actæ
 uitæ meritis, à tot superatis laboribus, tot exhaustis ærumnis,
 Pontificatum ei primum Max. traderent, & à Pontificatu
 Max. suo ipsius tempore, at Reip. heu quam alieno, certum illi
 inter pios, ac beatos manes locum attribuerent? Ab hoc loco ad
 Pontificia Farnesæ acta pergens, multis de causis dum eius uir-

entes enumerare cupio, cum animi quadam suspensione hæſeo. Nam si multas quod uideo necesse fore, prætermitto, facile uos animaduersuros intelligo, parcius illum atq; exilius multo quam oportuit, collaudatum; sin pleræque omnes persequor: uereor Patres, ne cum uos longiore oratione detinuerō: in hac interregni trepidatione, uestrarum ingentium occupationum non satis, ut debui, rationē uidear habuisse. Scio non frustra esse à maioribus nostris institutum, ut magni, & illustres uiri in funere laudarentur. Hunc illi scilicet, perpetuæ orationis honorem, & ad grati erga benemeritos animi memoriam declarandam, & ad corporum & animorum imaginem exprimendam, ac postremo ad uiuentium animos ad illorum æmulationem excitandos, multo magis accommodatum & appositum, quam cæteros omnes iustorum & parentationum ritus censuerunt. Hunc maiorum morem non satis habuisse me ratum putaro: nisi plene atque absolute singulas laudationis partes peregero. Verum cum multæ sint huius quem nunc lugemus Pontificis Max. laudes, tanto iis quæ hominibus attribui possunt, maiores, quāto inferioris ferè ordinis Pontificatus ipse Max. omnem cæterorum omnium hominum statum exciperat: Eam mihi statuo præcipuam hac in parte cautionem esse debere, ne dum nimis diligenter omnia persequi studeo: maximarum & maxime illustrium rerum per quas Pauli fama æternitati se facile adæquauit, nihil penitus loci relinquam. Testata est eius Patres, omnibus suorum omnium familiarium ac necessariorum uocibus temperata, integritas, innocentia, animi moderatio. Ciuiles hæc ac populares sunt uirtutes: quam uero non multis communes,

Continen
tia & reli
quæ uirtu
tes.

munes, tam, cum ad rectam bene uiuendi rationem, tum ad ho-
minum inter ipsos societatem conseruandam, necessariae, ut sine
his hominum uita non modo non humana, sed ne uitalis qui-
dem (ut ita dixerim) existimari possit. At his præsertim eta-
te iam prouectior Alexander, maxime excellunt: Ab omnibus
enim uel amorum, uel exstructarum mensarum & poculorum,
uel cæterarum, quibus humani sensus quasi titillari solent, uolu-
ptatum lenociniis sic animum auocauit, ut omnium qui cum no-
rant familiaris iudicio, nemo quisquã habitus fuerit frugali-
or, aut continetior. Atque cum quidem in iis, quas ante nomina-
ui, uirtutibus habitum fuerat consecutus, ut omnis in eo cupiditas
ita iam defuerit, aut potius restincta esse uideretur, ut que dum
taxat suauia essent, non magis repudiaret, quam omnino non ap-
peteret, Neque magis caueret, ne quid indecore, effoeminate, aut
libidinosè diceret, aut faceret, quã ut quod se perante homine indi-
gnum putari posset, ne cogitaret quidem. Ac tantopere à quo-
uis turpitudinis genere abhorreret, ut cum nihil, nisi quod maxi-
me deceret, ageret, aut moliretur, nullis pudoris, aut uerecundiæ
subsidiis, ac ueluti quodam rationis freno indigeret. Quid enim
reprehensionem ueretur, cui nihil pudendum, aut erubescen-
dum in mentem ueniebat? Abducebat uero quam longissimo
eius cogitationem ab omni quæ splendidioris fortune comes esse
consuevit licentia, ab omnibus libero atque ingenuo homine indi-
gnarum uoluptatum ineptiis, acerrimè illud quo ab ineunte
etate, ad extremam usque senectutem flagrauit, scientiarum
atque optimarum quarumque disciplinarum studium: Nam quid
quid

quid succisui temporis, ē maximis poterat occupationibus eripere, id totum ad eos legendos & peruolutandos auctores conferebat: qui uel Græca, uel Latina oratione, quod uis diuinæ, aut humane doctrinæ genus literarū monumentis mandassent: Cuius rei maxime perspicua extant argumenta, sexcenta prope librorum uolumina ipsius manu, à primo ad postremum paginarum marginem politissime ac scientissime pernotata. Ex his ille fontibus dicendi, intelligendi, res maximas gerendi, præcepta hauriebat. Neque solum ut Latina Græcaque lingua uteretur tanquam patria & populari hac nostrate (fuit hoc enim ei, ut scitis Patres maxime peculiare munus) consequebatur: sed ea etiam, quæ summa & iucundissima ex rerum cognitione percipitur, uoluptate contentus, reliqua prope omnia oblectamentorum genera contemnebat. Quod si, aut uoletudinis, aut ingenii recreandi causa, aliqua sibi esse opus animi relaxatione intelligeret, modo in Sabinos, modo in Phaliscos, ubi plura habuit gentilitiæ hereditatis ac dictionis castella secedens, uel sylvarum & uiridiorum ipsius maxime solertia diuensorum aspectu, uel elegantium & literatorum hominum, quorum semper domi habuit selectam copiam, semhil à gratus & musis abhorrentibus oblectabat sermonibus: quos ipse, ut erat inter suos maxime festiuus, eo suauitatis atque urbanitatis sale aspergebat, ut quam gravis & ornatus inter collegas suos in curia, tam in amicorum cœtu iocundus & dulcis uideretur. Apposite itaque, quod quidam ex eruditorum numero de M. Antonino Pio literis prodidit, de hoc suū prædicabant. Quod frangi esset sine contumacia: uerecundus si-

Studium.
literarū

Animi re-
laxatio-
nes.

ne ignavia: sine tristitia grauis. Fuit illud in *Alexandro* summae modestie: quod nihil sibi unquam uel arrogauit, uel poposcit: sed hominum de se iudiciis acquieuit: Quod suam in omni uel publica, uel priuata disceptatione, non auctoritate, sed rationibus sententiam comprobauit. Neque plus omnino unquam contendit: quam quod aequo animo ab iis contra quos erat nonnunquam dicendum, acciperetur. Atquo ita ueritatem & dicendi libertatem tuebatur: ut nemo tamen se ab eo lesum queri posset. Fuit animi eximie cuiusdam moderationis: quod inuidos & obtrectatores (cuiusmodi fere homines amplio rem fortunam, cum uirtute coniunctam petulantius plerumque lacessere consueuerunt) nunquam ipse acerbius ultus fuit: quam ut ignoscendo existimare eos cogeret, se cui essent infensi, indignissimum fuisse: Quodque Pontificatum *Nerac.* cum petisset nunquam, his uero antea paucorum ipsius felicitati aduersantium collegarum contentione extortum sibi quasi de manibus perspectum haberet, nihil tamen grauius questus est, quam ut diceret à Deo tam diuinum honorem, non ab hominibus decerni: à se illum remouendi neminem facultatem habiturum: si sua sibi diuinitus aliquando maturitas adforet. Fuit incomparabilis humanitatis ac facilitatis: quod nemo in ullo eius aut magistratu, aut praefectura quoties uoluit non est admissus, non patientissime quandiu uoluit auditus: non ita dimissus, ut si quod maxime uoluisset, non impetrasset, intellexisset demum se postulare non debuisse, confiteretur. Fuit integritatis, quod à iusto, aequo, bono, nulla cum gratia, nulla cuiusquam preces auertere potuerint: Quodque semper iniunctum pecuniae, in-

uolatum

violatum cuius corruptelæ animum gesserit. Quid uero dicam, quantum fidei constantia ac perpetuitate, quantum liberalitate ignotos sibi pariter ac notos deuinxerit: Cum nulla Europæ pars, nulla Italiæ Ciuitas, non magnam aliquam & insignem gratiam Farnesio Cardinali debuerit, egerit? Et ea domum pro certis maximeq; ueris homines haberent, quæ ab eius ore, seu uocis potius oraculo profecta dicerentur. Hospitalitas magnum & præclarum quoddam est in Principe uero decus: Quid enim facere possit elegantius, quid luculentius, quam si eas quibus abundat, copias bonorum commodis impertiat? Id laute semper & splendide fecit Farnesius. Nam & urbana domus quam & ante amplissime dimensam atq; exædificatam habuit, & nunc ornatissimam & plane Pontificiam nepotibus reliquit, & quas item in singulis suæ ditionis castellis magnifice extruendas curarat: eæ omnes & illustribus hospitibus, & peregrinis ac uiatoribus qui undecunque diuertissent, semper potuerunt. Iam uero quo officio, quo studio amicos coluit, qui neminem dilexerit, quem aut suo non prouocarit beneficio, aut cui de se bene merito non large ac prolixe gratiam retulerit? Quis uero fuit in cognatos, affines, aut quauis coniunctos necessitudine, pietate, qui neminem eorum suæ cuiusquam facultatis, aut felicitatis expertum esse siuerit? Nam quanta in nepotibus quam liberalissime educandis, atque instituendis fuerit cura atque diligentia, ex eo liquido constat, quod à Præstantissimis doctoribus atque optimarum quarumque artium magistris, & puerorum mentes honestissimis moribus, ac præceptis sine ulla indulgentia

Nepotum
institutio

imbui atque informari. Et iam adolescentium ingenia omni-
que Latina Græcaque lingualiteris mandata fuerit, uel intelli-
gendi, uel dicendi facultate erudiri, instrui atque expoliri uolue-
rit. Quod ipsemet & quid discerent, secum cum illos haberet,
cotidie inspiciebat, ad omniaque uite officia certis rationibus
atque exemplis, teneram eorum et aetatem fingeat atque informa-
bat: & quod tum per ipsos Præceptores, tum per alios graues
ac optime fidei uiros, quandiu & Bononiæ & Patavin fuerunt,
quo studiorum eos causa dimiserat, an in officio manerent, ut cer-
tior fieret, sedulo operam dabat. Qua certe rectissime institu-
tionis solertia, ad præclaram adolescentulorum indolem adun-
cta effectum est, ut non aui magis uoluntate, quam ingenti ue-
stro consensu ac fauore, præmaturæ uirtutis præmiis fuerint
decorati. Et eorum quidem nunc partim armis, partim toga mu-
neribus & uestro Paures, & maximorum Principum de ipsis iu-
diciis ac beneficiis egregie respondent. Hæc ego de popularibus
quibusdam (ut ita dixerim) Farnesi uirtutibus, tam breuiter
perstrinxi: aut summis potius (quod aiunt) labris degustau-
i: quod non uobis tantum nota sunt omnia: sed urbana etiam ac
peregrinæ multitudinis sermonibus celebrata: Quodque tanto
plura supersunt tantoque ampliora, ut ualde uerear, ne si omnia
colligere conatus fuero, ac non multo plurima tacite recordationi
uestre reliquero, non diligentior, sed superstitiosior quodammo-
do uideri possim: qui magna hæc quidem per se, longo sane in-
teruallo maioribus, quæ de Paulo Pont. Max. commemoran-
da sunt, minora, non quasi transiliens atq; omnino missa faciens,
ex hoc

ex hoc loco iam pedem proferam, & suscepto tandem operi legem ac modum statuam. Quare ne quis orationem meam nimis late uagantem, nimisq: in multas dissectam particulas fastidiat, aut stomachetur potius, de multis & maxime laudabilibus Farnesi uirtutibus, meum Patres silentium æqui boni faciatis, uos obsecro. Nihil enim agam de singulari eius uiri in rebus circumspectiendis solertia, in bonis expetendis & contrariis uitandis ac fugiendis prouidentia: quibus in rebus cum dominari constanti omnium opinione crederetur, Christiane Reipublicæ & Romanæ in primis curiæ oraculum prope quoddam habebatur: Solus enim & quæ euentura essent, è certis rerum principiis, multo ante quasi præfagire, & si ita opus foret, præcauere ac propulsare, tum admirabili ui ingenii ac celeritate, tum iudicii exacta quadam subtilitate posse uidebatur. De sublimium rerum appetitione, & humilium contemptu, Deque firmissimo animi robore cum in periculis adeundis, tum aduersis in rebus fortiter & constantiter perferendis, Ac simul de ea quam quouis tempore admirabilem præ se tulit, in magnis & præclaris operibus suscipiendis & aggrediendis magnificentia, nihil omnino in præsentia loquor: Quod tamen si fuerunt hæc laudes perpetuo illi uite comites, iccirco tamen quia tanquam regiæ atque heroicæ uirtutes inter ceteras eminent, poterunt eæ inter Pontificatus acta aptius cadere & insignius (ut ita dicam) interlucere, Nam quæ adhuc de eo à me dicta sunt, & si tacito uostro omnium consensu comprobari debuissent nihil dubito, nudis ta-

men

men rerum uocibus enumerata, non factorum sunt ad singula uirtutum genera adiunctione illustrata. Quod si Patres, huius funeris oratione decorandi munus, paratiores & omni dicendi facultate eminentiores uiri suscepissent: quanto hæc illi quæ ego tenuitur pro ingenii, memoriæq: meæ imbecillitate delibauī, omnia uberius, ac magnificentius egissent? Quam grauitèr illi, quo uerborum & sententiarum ornatu, quo spiritu, qua uoce, quo oris & linguae sono debitum Farnesio quamplurimarum uirtutum testimonium dedissent? At me, ut quæ illi consecuti dicendo fuissent, ne conari quidem audeam, terret uirium mearum conscientia: terret ob exercitationis insolentiam, loci huius amplitudo, confususq: uestri maiestas. Mentem obruit rerum ea congeries, quam ne longissimi quidem temporis, ne dum tam subita tamq: paucorum dierum comprehensura fuerit meditatio. Omnis uero conatus mei impetum debilitat, & infringit, ex orbitatis nostræ recordatione animi angor: à quo, & si cursus atque incitatio orationis cogitationem nonnunquam aufert: quoties tamen ad uestras, Patres, lachrymas, ad feræles istas publici luctus significationes oculos refero, toties rediuiua quadam doloris aggressionē opprimo me, & confici sentio: Atque eo impatientius doleo: quo uisibilior communis huius doloris causa menti obuersatur. Fingamus enim animis, non Paulum. III. Pont. Max. sed Alexandrum Farnesium Cardinalem, Hostiensem Pont. Senatus Principem lugeri: Si tam uitæ dignitatem per quam in qualibet sue ætatis parte, antequam Pont. Max. fieret, tantum nominis & gloriæ adeptus fuerat: grata memorique recordatione

com-

complectamur, an quavis publici luctus & mæroris significa-
 tione non existimemus eius funus celebrandum, cuius vita omnis
 tam fuerit omnibus gentibus ac ciuitatibus, atque uniuersæ Reip.
 sæpe utilis ac salutaris? Nihil, Patres, facilius credi potest: quam
 si Cardinalis cum esset, diem suum obisset, omnibus totius Ciui-
 tatis ordinibus teterrimum fuisse atq: acerbissimum illum diem
 futurum. Parentem alii sibi, fratrem alii, patronum multi,
 Cardinalem omnes, qualem nulla unquam ætas aut meliorem,
 aut omni laudum genere præstantiorem protulisset, ex oculis
 sublatum suis, multis essent lachrymis, ingenti luctu ac mæro-
 re testati. At quanto nunc tristius uos eius, Patres, obitum de-
 ploratis, qui cum uobis pater semper fuisset optimus, ac aman-
 tissimus, Fratres uos tamen & more maiorum nominabat, &
 fraterna quadam facilitate atque humanitate sibi uos cotidie
 deuinciebat? Qui cum ad eas quas constantissime coluerat, dum
 inferiore esset loco uirtutes, heroicæ ac plane Pontificiæ gloriæ cu-
 mulum omnem addidisset: quis non quasi diuinitatis quendam si-
 bi solem ereptum, non egerrime ferat? aut quis penitus, atque in-
 timis sensibus conceptum dolorem, ut per gemitus, lamenta &
 ploratum non erumpat, comprimere ualeat? Verum enimuero,
 si piuum fasque est, Patres, abducamus à luctu tantisper cogita-
 tionem, & lachrymis tantillum subtrahamus temporis; dum
 non maioris iam Alexandri Farnesi Cardinalis; sed Pauli
 . I I I . Pont. Max. acta, non copiosa magis & pro rei dignita-
 te ampla atque uberi oratione, quam simplici quadam & il-
 laborata pii doloris testificatione percensemus. Hic ego Patres,
 rerum

rerum à Pont. uestro Max. gestarum tanta me mole obrui sentio, ut in summa ac prope immensa copia & uarietate fatiscat quodammodo mens, & huc illuc dum errabunda uagatur, nuspiciam consistat: Quin abortis confusionis ueluti cuiusdam tenebris nullum uel ad ordinandas, uel ad continuandas ac connectendas orationis partes meditationi meae lumen praeferat. Quare quod me omnium conturbat maxime, etiam si principium in promptu fuerit, non continuo tamen mihi posse uideor, satis certum dicendi exitum reperire. Sedenim eum in amplissimum huius Pontificatus campum, spatiosum illum quidem omnium in omni postera aetate oratorum & scriptorum ingeniis, officiosius multo & obedientius, quam consultius descenderim, ita spatium in eo meum conficiam, ut cum rerum summas eodem quosum exorsus, breuitatis ac celeritatis cursu persequi conatus fuero, tacitis expectationibus uestris multa potius à me praetermissa requiratis, quam immodicae uos orationis ulla facietate affectos conqueramini. Id unum uos obsecro per uestri amplissimi ordinis Maiestatem, per sanctissimas hasce aras atq. focos, utriusque confessus Patres amplissimi, Regum ac Rerum publicarum legati qui adestis, Postremo omnes cuiuscunque ordinis uiri clarissimi atq. ornatiissimi, ut meae in dicendo facultatis inbecillitatem, uestra humanitate atque aequitate fulciatis, et rei magnitudine territam perculsamque pene mentem, tum aurium, tum animorum multo maxime benignitate subleuetis atq. erigatis. Quam longe, lateq. Christianae Reip. nomen patet, ad omnes orbis terrae partes de summi uiri, ac uerius herois non Pontificatus

Pontificatu solum, sed ipsa etiam æternitate dignissimis laudibus fama peruaserat: Augebat eam consentiens populorum prædicatio: Confirmabat cotidiana nouorum in alias atq: alias gentes, ac nationes officiorum accessio. Cum Clemente. VII. uitæ muneribus perfuncto, unus qui Reip. gubernacula teneret, Collegarum omnium suorum in hunc eundem conspirantium suffragius dignissimus est habitus. Quare non ut sæpe & legimus, & ex natu maiorum sermonibus accepimus accidisso (atque ut ne in noui Pontificis creatione accidat, uestræ fuerit Patres, prudentiæ ac bonitatis præcauere) tunc longius duci ac per dissidia partium protrahi comitia quidquam necesse fuit. Vna est mora interposita: dum exequiarum iusta Clementi fierent, atq: exinde more maiorum totum simul collegium se intra illa septa, quod conclaue appellamus reciperet, eo ipso die, quin ea ipsa pene hora, collegæ omnes ad Farnesii pedes accidentes, atque una omnes uoce Pontificem eum salutantes, communi prius concursu & gratulatione, mox cum uultu omnium et uoce consentientibus tabellarum punctis, & sua perpetua, & omnium Reip. partium iudicia comprobarunt. Ad cunctas iam Reip. partes faustissimæ huius renunciationis nuncii peruenerant, & PAULI. III. nomen letissimis uocibus celebrari, ac maxime effusis plausibus, et gratulationum exquisitis significationibus in cælum attolli cœptum fuerat: Ornatissimæ à maximis regibus & florentissimis ciuitatibus missæ legationes, maxima earum qualibet pro summo officii sui declarandi studio, suscepta ecleritate, unicum totius Reip. parentem agnouerant, salutauerant, adorauerant.

Pontifex
creatur

D Cum

Cum ille non retinendis modo, sed augendis atque illustrandis earum, de quibus ante locuti sumus, uirtutum operibus, nouis uero & plane Pontificiis ingentium quarundam laudum meritis adiungendis, facile declarauit, se unum, qui & tanto patrum consensu crearetur, quique tanto omnium gentium ac nationum plausu Pontificatum iniret, dignissimum fuisse. Atque omnino perfecit, ut Pontificia cognomina non speciosi quidam supremi honoris tituli, sed bene ac laudabiliter factorum testes, atque indices haberentur. Sanctissimum enim, quod est Dei obseruantissimum, eidemque Deo carissimum, euentorum felicitas, Beatissimum, omnibus numeris absoluta, ac propriis nitens & contenta bonis uita, maximum, præclaræ ac plane diuinæ quedam in rebus omnibus exequendis facultates, iure ac merito appellari eum debuisse, ut cuncti mortales sibi persuasum haberent, haud dubie effecerunt. Sed ad Pontificatus acta mea mox accedet oratio, si prius uos illud Patres monuero, non esse me singula ad certa uirtutum nomina quasi certa capita relaturum. Nam cum præclara quedam sit, & admirabilis ac planè diuina humanæ mentis uis, quam sapientiam uocamus, ea humanæ uitæ laudum omnium quasi chorum efficit: Ab ea omnis recte sentiendi, intelligendi atque agendi, Ab ea etiam bene atque ad res accommodatè dicendi omnis disciplina ortum ducit: Atque hinc illa merum certissima lex, & regula uirtutum earum, à quibus omnis nostra actio proficiscitur, dux prudentia existit: sine qua fortitudo, iustitia, fides, clementia, animi moderatio, uel alius postremo quiuis bene comparati & constituti animi habitus,

habitus, in homine aut nullus omnino spectari, aut certe exiliter ac tenuiter potest elucere. Satis itaque Patres habuero, si dum in rerum à PAULO gestarum commemoratione uersabor, ostendero quanta fuerit in consiliis de rebus maximis capiendis sapientia, quanta in gerendis prudentia. Ex eo enim & illud facile colligi poterit, fuisse caelestem illum fauorem, quam felicitatem & bonum euentum nominamus, uiri post homines natos maximi, sapientiae ac prudentiae, non fortunae tribuendū. Et quoniam certissima ac sempiterna praepotentis Dei lege, eam Christianae professionis communionem, quam ecclesiam dicimus, cum ciuili Rep. tanquam spiritum in omni animante natura cum corpore, in humana, cum spiritu mentem, coniungi oportuit, ex ipsa Pauli factorum operumque serie, modo Iesu Christi seruatoris nostri summum legatum, & pro geminis uerae religionis propugnatoribus Petro atque eo, cuius sibi consulto nomen adsciuit Paulo, sacrorum uindicem atque Antistitem, modo uero traditi à Constantino Syluestro atque iis, qui deinceps Syluestro successerunt, imperii defensorem & gubernatorem optimum ac generosissimum agnoscetis. Atque omnino qui in Rep. non dignitatis magis atque honoris, quam uirtutum & omnis liberalis cognitionis principatum obtinetis, quodnam Pont. uestri Max. factum, uel cum pulcherrimo illo & maxime diuino pietatis, sanctitatis ac religionis nexu coniunctum fuerit, uel à quo praecipue totius decori atque honesti fonte deriuarit, quam facillime tacita uestrum quilibet cogitatione dispiciet. Uestra ego in rebus percipiendis ac diiudicandis solertia, uestra in opti-

mi ac sapientissimi Pont. laudatione auscultanda, pio silentio atque attentione fretus, arbitrato meo institutum eius actorum ordinem persequar. Agebat Paulus, cum Pont. Max. declaratus est, annum .LXVII. Ad imminentia tamen Reip. pericula propulsanda, cum senili prudentia, atque consilio iuuenilem quandam alacritatem coniungendam putauit: Atque ita omnia quæ fieri, quæq; agi oporteret maturanda, ut si per paucos ætatis annos reliquos habuisset, nihil tamen minus quam qui diutissime in Pontificatu uixissent, de Rep. benemeritis uideri posset. Sin è uita (quod maximum præpotenti Deo beneficium debuimus) serius quam tunc sperauimus excessisset, multorum Pontificum Max. uniuersam gloriam unus longo intervallo superaret. Sed quæ tandem eius Pontificia acta fuerunt? Quæ ad Dei cultum pertinuerunt primum colligam. Nam cum omnibus imperiis haud dubie religio salutem apportet, & à propitiis ac placatis numinibus mutue fidei firmitas, & incolumitatis ac securitatis certissima spes sese in hominum animis corroboret, Merito, iacto hoc sui Pontificatus fundamento, & ut beati essent, qui in ipseus essent imperio, effecit, Et per quam facile sibi ad immortalitatem uiam munuit. Hac in parte talis fuit Paulus, ut post Sylæstrum, Leonem, Caium, Gregorium, Cælestinum, qui postremæ fere Pontificum Max. in diuorum fuere prouitæ sanctitate numerum relati, nemo accuratius, nemo uigilantius boni sacrorum principis, fidelis pastoris, seduli ac solertis humanorum animorum tutoris officio functus fuerit. Sacra enim is ut per minores Pontifices, & quosuis sacerdotum ordines ubiq;

Pontificatus acta.

Religionis curæ.

eunq; Christianum nomen uigeret, rite pureq; fierent, diligentissi-
 me curauit. Nullum in urbe fuit priscæ atq; augustioris religio-
 nis delubrum, in quo non sæpe ipsemet rei diuinæ præfuerit. Sta-
 tas certe solennesq; cærimonias nisi cum forte langueret, nun-
 quam intermisit. Iam uero qua ille caritate deuotarum Deo fa-
 miliarum egestatem subleuauit? Quam pia beneficentia eius
 quod Iesu nomine celebratur, atq; in dies longe lateq; per Italie
 atq; Europæ cinitates propagatur, laudatissimæ uitæ fratrum
 collegium prosecutus est? Quam misericorditer parentibus ac
 fortunis orbatu pueri & uirgines, ut publice alerentur atq; ad ci-
 uilis uitæ munia educerentur, instituit? Iure igitur uos pueri san-
 ctissimi Pontificis alumni, funebres preces uestras singulti-
 bus interpellantes alteram hanc orbitatem lugetis. Priorem ue-
 strum plurimi uix dum nati, aut certe paruuli infantes amisistis,
 uel ne sensistis quidem. Hunc non communem tantum, sed ue-
 strum ipsorum proprium parentem agnoscebatis. Sed pergit ius-
 ta facere, pergit tam de uobis benemerito parui parentare. Ve-
 stra illum pietas iam Deo gratiosiore reddit. Alius mox sanctitas
 Dei uobis numine conciliabit. Atq; ut in eo, qui successerit, Pauli bo-
 nitatē ac misericordiā minus desideretis, efficiet. Conuertit me Pa-
 tres in diuersa templi parte nō magis sacrū, quā lugubre carmine con-
 cinentiū puerorū uox. Redeo ad religiosa Pauli acta. Quā illud
 ad exorandā Dei clementiā efficax esse debuit? Quod cū propter
 duras illas urbis calamitates et populorū defectiones, exhaustum
 et uacuum omnibus copiis ærariū, ablatis annuis uectigalibus, nudā
 et omni ope spoliata Rēp. offendisset, ingētes et maxime necessariū
 de qui-

de quibus alio loco dicemus, essent cotidie sumptus tolerandi, relatis à misericordium largitionum dispensatore, uiro integerrimo rationibus, innumerabilis & incredibilis quedam pecunie summa, cum ad egentium misérias alleuandas, tum ad nobiles ex infima plebe uirgines collocandas erogata reperiatur. Qui tam liberalis in pauperes fuerit, quanta is fuit in Christum, Deum scilicet ipsum, obseruantia? Cum ipsemet omnis misericordiæ & benignitatis fons Christus, ipsa ueritatis uoce, sibi eos benigne facere, qui pauperibus benigne facerent, affirmarit. Magnum hoc & præclarum, quoque minus in propatulo gestum est, eo pleniore uoce, & magis illustri prædicatione dignandum. Illustria enim illustrium uirorum merita uulgo quæ nota sunt, ne temporis diuturnitate obscurentur, hominum uitæ conducis ad posteritatis memoriam prodere. Et quæ dum fierent, quanto dissimulantius facta fuere, maiorem pietatis laudem meruerunt, ea, si qui rescierit, non magis ad auctoris laudem, quam ad imitationis exemplum in lucem non protulerit, neque ingrati ille, neque inuidi animi crimine carere merito iudicetur. Sed ad ea, quæ palam fuerunt hominum oculis, aut auribus exposita, quæq; occulte geri non potuerunt, religionis opera reuocetur oratio. Quid uero tam laudabile, tam ad hominum salutem, & beatæ uitæ rationem accommodatum, tam Pontificale, tam cum Christi seruatoris nostri iussis congruens, quam quod cogitationes, consilia, studiaque sua omnia ad pacem inter summos Reip. principes conciliandam conuertit. Didicerat nempe cum ex sapientissimorum hominum sententiis, tum uero maxime ex diuinarum uocum

moni-

Pacis studium.

monimentis, pacis ui & natura omnem humane uitæ felicitatem, omnem promissæ à Deo immortalitatis spem contineri. Sciebat è discordia & dissidiis, magnorum semper imperiorum perniciem atque exitium extitisse. Viderat in magnis totius Reipub. ac totius Italiae atque ipsius urbis cladibus, ob graues & fædas principum inimicitias diuina atque humana iura uiolari, sacra prophanari, prophana ferri, agi, rapi crudeliter ac miserabiliter. Animaduertat ac pene suis oculis inspectarat, seuum illum & præferocem, nominis legumque nostrarum hostem sempiternum Turcarum Tyrannum, captatis atque obseruatis ciuiliū, quæ inter se Christiani gererent, bellorum motibus, dum odiis atrocissimis incensi, uel de finibus imperii, uel de iure regnorum disceptarent ac digladiarentur, Christianæ Reipub. ualidissimis propugnaculis Rhodo & Tauruno expugnatis, capta uniuersa inferiore Pannonia, maximas equitum peditumque copias iam bis in Pannoniam superiorem, apparatissimas instructissimasque prædonum classes, ad utranque maris nostri oram populandam atque opprimendam immisisse: Præsentissimum igitur ad sananda Reip. uulnera, atque ad Turcicam pestem depellendam remedium esse arbitratus, si maximi ac potentissimi duo Reges, Carolus. v. Imperator, & Franciscus. i. Galliarum Rex in gratiam redissent, & amicitia firmoque fædere coniuncti, aut arma posuissent, aut in communem hostem optimis auspiciis conuertissent, Artis de pace legatis semel & iterum, spectatissimæ grauitatis atque auctoritatis è uestro, Patres, collegio uiris, cum minus uulgo quam uellet, quamque opus esset, profectum intelligeret,

Quod

Nicæam
profectus

Quod ad tam graues tamque inueteratas offensiones ac simultates, noua quædam, ac minus usitata medelarum genera erant adhibenda ac sæpius nouanda atque instauranda, ea dum adhibet, quibus sanctissimus ac sapientiss. Pont. non rationibus, quibus iustis piisque precibus ac deprecationibus non contendit? Cum tam grauis annis ipsemet Nicæam usque profectus, in Caroli ipsius Caesaris, et Francisci Regis, (ambos amplitudinis & Maiestatis causa nomino) congressum & colloquium uenerit? Nam cum biennio ante, redeuntem confecto punico bello Caesarem in urbe triumphali cum pompa accepisset, & ex eius sermonibus perstexisset, non fore difficillimum utrumque Regem ab omni iræ acerbitate ad placabilitatem & lenitatem reuocare, modo ut congregederentur familiarius, eorumque ipse congressibus & sermonibus interesset, ei quam de pace conceperat spei, Reip. ductus caritate, & acerrimis religionis tuendæ aculeis incitatus, omnem ualetudinem, quin uitam potius ipsam censuit condonandam. Tuliit uero longi atque incommodi itineris optatissimum fructum. Perfecit enim cum rationum ui, tum mitissimæ orationis lenitate, & pertractandorum animorum peritia, ut pactis in annos. x. induciis, tantas ac tam certas inter se coniunctionis significationes illi reges dederint, ut qui ocium ac tranquillitatem expeterent, illas uerbo inducias, pacem re futuram augurarentur: et qui rerum essent nouarum cupidores, ad nouas iam artes turbandi ac rescindendi omnia, se inuestigandas compararent. Non destitit Paulus, cum eodem cuius certissimum fuerat numen secutus, Deo reducente in urbem redisset, omni studio & conatu suo ex
periri,

periri, eniti, elaborare, ut omnem quæ adhuc reliqua esset, odiorum scintillam restingeret: omnem discordiarum omnium memoriam sempiterna oblivione deleret. Quare quadriennio post, ultro ad Carolum Imp. Lucam venit, ut sua apud eum auctoritate conglutinatam illam concordiam ætius astringeret, & iam tunc pacis fundamenta, seditionum nequitia ne conuellerentur, obsisteret. Duo tantum medii anni fuerunt: cum iam tertio eadem de causa ex urbe profectus, Buxeti ad constitutum colloquio diem, eidem Imperatori, quo eum in pristina sententia confirmaret, præsto fuit. Si hæc apud eos, Patres, dicerentur, qui non ipsi, sicuti uestrum pars maxima, rebus omnibus interfuisent, quibusq; hæc audita tantum, non præsentium oculis fuissent exposita, An illi non fingi omnia ad Pauli uitam exornandam, non ad rei gestæ ueritatem exponendam commemorari putarent? Quid enim creditu minus facile, quam hominem qui in toga atq; in ciuilibus duntaxat officiis, inter sacra et religionis cærimonias ætatem totam exegisset, iam septuagenarium & eo etiam natu grandior, in magnis anni caloribus, per asperissimos Apennini trames, in extremos Liguriæ fines, & ad maritimas alpes contendere non dubitasse? Et eundem ex annorum quinque intervallo bis, inualidum, ultra uires, sortemque senectæ (ut Poeta inquit) ab urbe in Hetruriam & medias citerioris Galliæ urbes excurrisse? Hoc quis unquam tam grandis natu Pont. Max. fecit? Aut quis in expeditionibus Imperator, in armis miles, in re nautica gubernator consenuit? Quis tam gelu, uel æstu obduraui, Qui id ætatis à longinquis itineribus non abhorruerit? Non

Ad Carolum Imp.
Lucam pro
fectus.

Buxetum.

E diuum,

diuum hominumque concessu senectuti suæ ocium ac quietem
 indulserit? At Paulus de se nihil fuit sollicitus, modo ut per se
 salua esset Resp. quam per se, atque eam solam, quam ipse co-
 ram constituisset ac firmasset concordiam, saluam fore confide-
 re sibi posse uidebatur. Vicit igitur omnem periculorum ratio-
 nem perpetua erga commissos fidei suæ populos caritas, spei ala-
 critas, laborem minuit. Religionis ardor, uix & infensarum ple-
 runque tempestatum incommodationem non patienter tantum,
 sed hilare etiam & iucunde sustinuit. O uirum prisca illa piete-
 te ac fide flagrantem. O memorandum omnibus gentibus ac se-
 culis pacis studium. Quo sane merito uix in priscis illis quidam
 Pontificibus, Lino, Cleto, Anacleto, Telesphoro, Urbano, Feli-
 ce, Clemente, Marcellino, cæterisque: qui sanguine profuso, suam
 posteris in Christiana professione constantiam testatam relique-
 runt, maius ullum potuerit prædicari. Merito itaque quacunque
 iter Paulus faceret, omnis ad tam pium, tanque uniuersum com-
 muni ocii ac tranquillitatis parentem, quasi ex cælo delapsus esset,
 cum admiratione incredibili inspicendum, ex uicis, oppidis & ur-
 bibus undique, in agros & uias multitudo se effundebat. Exul-
 tantes gaudio omnis oppidanorum atque agricolarum turba Ma-
 tronæ cum pueris & uirginibus, cuiusvis ordinis atque ætatis uiri
 Oleæ frondem præferentes, relictæ à Christo hereditatis, Chri-
 stianæ Reip. ipsius nempe pacis uindicem, & sacrosanctæ per pa-
 cem potissimum religionis in pristinum decus ac dignitatem resti-
 tuendæ auctorem salutabant: optimum commissi gregis pasto-
 rem, communem ac uerum Christianorum omnium regum & po-
 pulorum

pulorum patronum appellabant: letis uocibus ac festis plaufibus itinera, cogitationes, colloquia, actiones profequebantur: fecunda omnia, uita in primis quam maxime longinqua spacia, salutem, incolumitatem, felicem reditum precabantur. Non audita commemoro: ipse ter eius itinerum comes fui, & sane nihil à me fingi & uestrum Patres, pars fere maxima, & tacita mea ipsius mihi testis est recordatio. Quid uero Paulus, ut his omnibus, huic de se hominum expectationi accumulate responderet, non molitus est? non egit? non contendit? adeundi fuerunt reges, adiit, inter esse ac praesse eorum colloquiis oportuit, interfuit, praefuit: fuit reditus in gratiam exorandus, exorauit. At non fuit ille quidem quam debuit perpetuus ac diuturnus. Quis nescit ingentes plerumque molitiones siue artis illae, siue naturae fuerint, extraneo aliquo & aduentitio impetu subito dirui ac subuerti posse? Magna & praeclara hominum opera, praecelsa urbium mania, iactas innumerabili manu moles repentini telluris motus saepe demoliti sunt: Aut subita quaeiam maris illuues, aut inopinatae late de hiscentis soli uoragines non ingentes tantum campos, sed summa etiam montium iuga absorbuerunt. Nulla est tanta cuiusuis reius, nullus tam uehemens impetus, qui cum humanae linguae potestate comparari possit, ea si facultate sua ad animorum coniunctiones disiungendas abutatur, nulla reperiri potest tanta mentis aut consilii stabilitate firmata concordia, quae maleuolorum ac factiosorum hominum uocibus, & non publici boni, sed suorum duntaxat commodorum satagentium sermonibus labefactari & conuelli nequeat. Quid igitur? ubi uidit tot ac tantos labo-

res suos, tantas animi corporisq: contentiones, certorum hominum improbitatem nè dicam, an potius impietatem? irritas fecisse, ac non modo uniuersum Reip. corpus per salutaria pacis remedia pristinam sanitatem non recipere, sed in dies etiam furiali seditionum ueneno, alia atque insuper alia membra extabescere, non protinus animum despondit, aut de pace spem abiecit. Nullum enim unquam tempus remisit, quin per legatos ab illa falsarum opinionum insania & bellici furoris amentia, principum animos auocare atque absterere conatus fuerit. Quoties instructas ad praelium acies, quoties collata iam prope signa, Pauli legationes diremerunt? Quoties infestissimorum & ad mutuam cladem paratissimorum exercituum tela, à Christianorum iugulis & ceru-

Bellum in
Turcas a-
uersum,

cibus modo in Turcas, modo in Pænos auerterunt? Turcicum ne-
ro bellum eius in primis hortatu & impulsu susceptum, ac terra-
marique ingenti apparatu gestum est: Triremes quam multas
non alius quisquam Pont. Max. sub certo Imperatore suo mi-
sit: Maritimas Terrestrisq: copias magno impendio, in summa
ararii tenuitate tandiu aluit, usque dum Cæsar Tuncum expu-
gnaret: A' Viennæ uero mœnibus, & à superi maris litore inso-
lentissimus atq: impotentissimus hostis, qui aulone in Italiam nu-
merosissimæ classis transmissionem moliebatur, intra suos ipsius
fines repelleretur. Interea uero cum eiusdem hostis neque cotidiana
insidias caueri, neque in dies magis inualefcentis ac se corrobo-
rantis impetus aliter sustineri posse compertum haberet, quam
si bellicosissimæ Germaniæ gentes ac populi, quæ per seditiones,
atque intestinas discordias, perque maxime impias de toto religio-

nis iure disceptationes, à Dei primum nomine, deinde à suorum
 etiam principum imperiis desciuerant, à cæco mentis errore abdu-
 cti furere iam desinerent, & ad ueram atque à maioribus tradi-
 tam, Dei sanctæ pureque colendi rationem reuocarentur, ad uni-
 uersum Christianæ Reipub. concilium, quod iam tum nix dum
 Pont. creatus, indixerat celebrandum, omni cura, studio, animi
 contentione incubuit. Non erant profecto in dubium ac in no-
 uam controuersiam denuo reuocanda, quæ de omni religionis iure
 ac forma, deque iis quibus religio ipsa contineretur quæstionibus,
 de sacerdotum uita & moribus, de tota Antistitum, atq; ipsius
 Pont. Max. potestate atque auctoritate, in tam multis conci-
 liis disceptata ac constituta fuissent, & in iis quatuor maxime,
 quorum decreta maiores nostri nō minore fere dignatione, quam
 ipsius Dei & hominis uoces æstimanda censuissent. Est consul-
 tandi atque ambigendi locus, cum in rebus neque discussis, neque
 conclusis assensionem omnem expedit sustinere. At quæ grauissi-
 morum uirorum & optime de Christiana professione meritum
 sæpe sententiis, suo sæpe ipsorum etiam sanguine sancitæ iam pri-
 dem essent deliberationes, non iam opinionum concertationibus,
 sed perpetua in obseruando atque obediendo fuerunt perseveran-
 tia prosequendæ. At id illi ut populi, illi ut perniciosarum sedi-
 tionum auctores facerent, cum perductum iri nunquam posse sa-
 tis iam exploratum & cognitum haberet, eam quam essent ar-
 etissime amplexati, non libere, sed licenter, non impure, sed im-
 pie uiuendi impunitatem optimus Pont. tanquam Clemens medi-
 cus, non ui & armis, quasi uitiatas & corruptas corporis partes,
 ferro,

Conciliū
 indictū &
 celebratū

ferro, & aduſtione cohercendam: ſed ea, quam ipſimet ſacram ueluti anchoram ſuarum ſeceſſionum habere ſe ſimulabant, ſola noui concilii auctoratione eorum uecordie atque amentie frenum ueritatis (ut ita dixerim) iniiciendum cenſuit. *N*antauam itaque primum celebrando concilio locum elegerat: *Q*uæ urbs conuenis omnibus ſecuritatem ſummam, præterea commeatus & quæuis commoda large ſuppeditare poſſe uidebatur. *V*erum exorti repente in inſubribus nouarum rerum motus, in loco ſtatuendo ſententiã ut mutaret, effecerunt. *Q*uare *V*icetie rurfus indixit, cum reliquam commoditatem, tum uero maxime ſoli ubertatem & cœli ſalubritatem ſecutus. *D*einde, quo ex omnibus *Germaniæ* ciuitatibus, à quibus erat illa diſſenſionum peſtis depellenda, minus grauate pro loci uicinitate quam uellent multi conuenirent, non finitimum tantum illis oppidum, ſed quod in *Germanorum* principum ditione erat, maxime fidum atque hoſpitale *Tridentum* conſtituit: *E*o uti prius *Vicetiam*, & legatos ſuos è ueſtro *P*atres collegio uitæ dignitate, & cum omni literarum ſcientia, tum diuini humanique iuris prudentia præſantiſſimos, alios ac ſubinde alios miſit: *E*o magnum minorum *P*ontificum numerum dimiſſis per *Europam* ad ultimas uſq; terras nunciis, in unum congregauit: *E*o *Germanicarum* ſectarum principes, nouarum religionum auctores & profeſſores creberrimis adhortationibus, paternis precibus & cotidianis ſuaſionibus ut aduocaret, emixiſſime operam dedit: *S*ed cum illi peruerſiſſimarum opinionum perſimacia obdurati modo cauſarentur, modo tergiuerſarentur, modo maledictis & contumeliis tam piam, tam ſalutarem, quamque

ipſi

ipsi per tot annos, quasi maxime necessariam efflagitarant, actio-
 nem eluderent, ubi uidet eos quos ad diem dictum adfore uix ut
 dubitaret, adduci poterat, frustra iam triennium expectari, atq;
 interea sumptibus intolerabilibus Reip. rationes onerari, non es-
 se tot Pontificum, qui ex aliis, atque aliis orbis terræ partibus, à
 Gothis usq; & Hibernis, quin Aethiopibus & Indis, Ac prius
 etiam nobis incognitis, paucis uero ante annis, Hispanorum Lusit-
 anorumque solertia repertis in Oceano Insulis Tridentum con-
 uenerant, patientia abutendum statuit. Mandat itaque per liti-
 ras ac nuncios legatis suis collegis uestris, Montio, Ceruino, Po-
 lo, uiris optimis & grauissimis, atque omnino quorum uicaria in
 tanto negotio uteretur opera dignissimis, certis ac statis diebus
 Patres in curiam ut uocent: Ibi que singulis consessibus res ad re-
 ligionis Reiquepub. summam pertinentes, more ritumque à maiori-
 bus tradito referuntur: Sententiæ grauissimæ atque ornatissimæ
 dicuntur: Senatus consulta magna cum auctoritate perscribun-
 tur. Iam prope erat ut sua tanto operi clausula adderetur, cum
 repente propter loci angustias (ut in conferta inquilinorum tur-
 ba par fuit) pestilenti morbi contagione, non tantum ignota ten-
 tari capita, sed cotidie illustrium etiam uirorum funera duci co-
 pta sunt. Noua igitur fuit concilio sedes deligenda. Aptissima
 uisa est Bononia, & quod non longius quam quatrIdui abesset,
 & quod omnem quæ illuc conuenisset multitudinem soli bonita-
 te alere, & domorum laxitate facile possit capere: Hospitalior
 uero gentibus ac nationibus urbs profecto nulla: Nam & opti-
 morum studiorum domicilium, & bonarum artiumatrix, &
 educatrix

educatrix ueluti quædam abhinc mille amplius annos fuit: Et quod loci, quo sua est opportunitate, nulla tam sepe cum Pontificibus Max. Regum atque Imperatorum congressibus & colloquiis patuit, & augustissima eadem semper habita est sanctissimorum fœderum ara. In eam igitur urbem ita curia Tridentina translata est, ut loci mutatione neque quæ ante decreta fuerant in acta referri, neque denuo alia referri unquam intermissum fuerit. Ea fuit Pont. optimi ac sapientissimi in peragendo concilio constantia, & per concilium ab alienatos opinionum peruersitate populos ad Christianæ legis ueritatem reuocandi studium: Tanta flagrauit Christiani nominis conciliandi & confociandi cupiditate, ut neque sumptus magnitudine, quem in alendo magno doctorum hominum numero iam prope totum quinquennium tolerauerat, nō desiderio clarissimorum uirorum, quorum cotidiana opera atque officio carere uix poterat, non potremo pestilentie imminenti periculo, à pulcherrimi operis progressu reuocari aut deterreri potuerit. Magna hæc sunt confirmati in tuenda ac redintegranda religione animi documenta. Sed quid tandem dicat aliquis hi tantarum actionum conatus Reip. profuerunt? Distructi iam Christianorum in Christianos gladii, non propterea ab ipso quasi Christianæ Reip. corpore auersi sunt. Est certe his Pauli consiliis eatenus profectum, quod pestis & discordiarum perniciēs omnis, est ad extremos artus à præcordiis et reliquis uitæ certissimis sedibus reiecta. Nec uero qui summa quæ sunt in quouis rerum genere, assequi non potuit, non summæ proximam laudem, quin & summam quantum in ipso fuit, mereatur,

mereatur, si cum ad optima quæque & maxime salutaria aspi-
 rarit, quæ optimis proxima sint, saltem fuerit consecutus. Vnum
 mihi restat de Pontificis PAVLLI actis memorandū, ante-
 quam ad eas uenio laudes, quæ non magis Pontificibus Maxi-
 mis propriæ sunt, quam in aliis inferioris etiam gradus princi-
 pibus, non illæ quidem frequentes & cotidianæ, sed quæ opta-
 ri ceteris, & ab iis qui in eorum sunt imperio, maxime expeti so-
 litæ sunt. Est uero id, & ad præsentium oculos atque animos
 memorabile, & ad posteritatis memoriam tam insigne, ut eius
 magnitudine tota orationis meæ uis debilitetur. In eo ego &
 quod rei ponderi iam prope succumbo, paucis immorabor: Es-
 simul quod cum uestris Patres coniunctum est laudibus, ue-
 stramque quam proxime dignitatem contingit, meæ uestri pu-
 doris uerecundie dicendi breuitate consulam. Estis uos Patres
 sanctissimum Christianæ Reipub. consilium. Certe uos estis &
 splendidissima terrarum lumina, atque ut appellamini, sacro-
 sanctæ Rom. Ecclesiæ Cardines: Quod scilicet uestri huius lon-
 ge grauissimi, atque ornatissimi senatus auctoritate ac senten-
 tiis, tanquam firmissimis Cardinibus, relicta à CHRISTO
 Apostolis, id est legatis suis, Reip. salus atque incolumitas nititur
 ac sustentatur. Quanto uero uestra ista supremæ dignitatis insi-
 gnia, fasces, lati clauis, atque apicis purpura, ordinis ac sessionis pri-
 matu, & ad speciem sunt quam ceterorum orbis terræ Princi-
 pum ornatus illustriora, & ad religionis ac maiestatis decus au-
 gustiora, tanto uos profecto decet non solum generis claritate, sed
 morum probitate, uitæ integritate, ingenio, uirtute, sapientia, at-
 que

que omni doctrina genere; ceteros omnes publicorum consilio-
rum auctores antecellere. Animaduersum uero est omnibus tem-
poribus, hanc ipsam Romp. uestram post acceptum à Constanti-
no Imperium, saluam maxime & florentem fuisse; cum non opti-
mam tantum Pont. Max. sed simillimos etiam Pont. Maximi
consiliarios, selectos scilicet uestri loci atque ordinis uiros, nacta
fuerit. Hac in parte supplendi quoties oportuit patrum nume-
rum, & optimum atque honoratissimum quenque hoc honore or-
nandi atque honestandi, nullius cuiusquam Pont. Max. laus
tanta fuit, quin eam PAVLI in patribus deligendis iudicium
adequarit. De Iulii. II. collegio iam uix unus & alter, non-
nulli quos Leo. x. conscripserat, Aliquot quos Clemens, re-
liqui erant, clari omnes, & quorum in magna temporum uarieta-
te ualde spectata uirtus fuerat. Eorum sibi quam simillimos con-
scribendos & cooptandos Paulus consuit. Fuit nobilitas, & na-
taliū splendor requirendus: Regio multos genere illustres adle-
git. Fuit uirtuti, fuit uitæ dignitati honos habendus: Ex omni-
bus Italie, ex omnibus Europæ partibus in uestrum ultro con-
fessum acciuit atque inuiauus, quibus uel ipse iam pridem iudicas-
set, uel minime dubia fama attulisset, primas honestatis ac sancti-
tatis, primas disciplinarum atque optimarum artium laudes de-
beri. Fuit laboribus pro Repub. susceptis gratia referenda: Mul-
ti in hunc ordinem sunt adsciti, qui studia, qui fidem, qui fortunas,
qui etatem totam in magnis & grauib. Reip. negociis ac mune-
ribus consumpsissent: qui corpus manifestus difficillimorum &
infectissimorum peritumq. itinerum, longinquarumque legationum pe-
riculis

De Cardi
naliū crea
tione.

riculis obiecissent : qui uitam deniq. caputq. suum uestræ Patres
 curiæ deuouissent, ac sanguinem etiam minime inuiti, dum eius sa-
 lutem & auctoritatem tuerentur, profundere parati fuissent.
 Quæ igitur & quam clara lumina, quæ uirorum decora, ad eos,
 quos proximi superiores Pontifices reliquissent, ex Pauli delecti-
 bus acceperunt? Præsentium ac uiuentium, uestro pudori par-
 cens neminem nomino : Nemo tamen istuc sedet, in quo, quæ pau-
 lo ante attigi uitæ ornamenta, qui uultus uestros atq. ora intuea-
 tur, non in singulis modo singula, aut in omnibus omnia, sed pro-
 pe in singulis omnia, quamfacillime quamque uerissime tacita
 agnoscat cogitatione. Sed quæ unquam magnorum & multiplici
 literarum & uirtutum laude cumulatissimorum hominum nomi-
 na delebit obliuio? Quæ temporum iniquitas pulcherrimas non
 corporis, sed suas animorum imagines, quas ipsimet æternis con-
 signarant literarum monumentis, poterit obscurare? Video Pa-
 tres, ex mea tam paucis expressa uerbis significatione uos commo-
 ueri : Credo quod animos uestros demortuorum collegarum ue-
 strorum, acri quodam cum desiderio subit recordatio, Contareni,
 Simoneti, Fregosii, Gimutii, Iacobatii, Aleandri, Bembi, Sadole-
 ti, Cortesii, Ardingelli : quæ illi fuerunt, summe DEVS, uitæ
 exemplaria? quæ ingenii, uirtutum ac doctrinarum lumina? Sed
 cum satis eos iam diu luxerimus, non committam ut refricanda
 tantorum uirorum memoria, aduentitii doloris causam querere,
 & quasi obductæ iam cicatrici manus uidear admouere. Scio ego
 Patres, ex eorum numero. quos PAULVS adlegit, alios multos
 eorum quos nominauit, & uestri adhuc uiuentium quamsimilli-

mos & uita excessisse. Verum qui primi cogitationi meae occurrerunt, eorum ego nomina enunciaui. Sed cum diuersis temporibus non pauciores quam LXXXV ab eo editi fuerint, quoniam eorum non maxime probastis? quem non dignissimum qui in uestro numero describeretur iudicastis? quem tam receptum non fraterno estis amore complexi? Nepotes quidem suos, ALEXAN-

Nepotum
in colle-
gium coo-
ptatio.

DRV M primum Farnesium, et Guidonem Ascanii Sfortiam, ex longo deinde interuallo Rhenutium Farnesium uix dum puberes uobis collegas dedit. Sed qua indole adolescentulos? quo ingenio? quam liberaliter? quam praeclare institutos? quam supra omnem aetatis captum, cum multa rerum intelligentia, tum mirifica quadam communis sensus praeditos excellentia? Et sane eos non modo uobis non recusantibus, sed rogantibus etiam atque efflagitantibus dedit. Et tam uerecunde eos nominauit, ut facile apparuerit, uobis obsequentiorem multo, quam nepotes ornandi cupidiorum fuisse. Quid uero potuit aut a uobis amantius expeti, aut ab illo elegantius decerni? Fuit hoc uestrae erga PAULVM obseruantiae perspicuum argumentum. Fuit ipsius erga uos fidei certissimum pignus, Firmissimum mutuae beneuolentiae uinculum. Et uero nunquam fuit quamobrem aut uos id expetisse, aut uestris ipsum precibus indulgisse poeniteret. Tales enim uobis domesticae disciplinae institutis atque exemplis praestitit Paulus. Tales ipsi pro naturae suae bonitate euaserunt, ut Pauli nepotes non magis de facie, aut de maximis quos per adolescentes coeperunt, et cum suorum omnium ordinum laude gesserunt honoribus, quam de morum et uirtutum praestantia, quasi faeces e generosa

nerosa stirpe propagines quibus facile possit agnoscere: Neq; ho-
 mo do quos praefer auiae feueritatis reuerentiam, praefer ingenii
 indolem atq; educationis rectissimam rationem, sanctior ista pur-
 pura & uestri confessus uerecundia, ab omni uitae prauitate faci-
 le potuit absterrere, & in uirtutum omnium officio, ac uera soli-
 daeque gloriae cursu continere. Sed quid Octavius? quid Hora-
 tius Farnesius? quid Sfortia Sanctiflorius? ab ipsa pene infan-
 tia, armis & uitae militaris consuetudine assuefacti? Quid un-
 quam non pudenter, non moderate, non ut maxime Romanae In-
 uentutis principes deceret, fecerunt? ordines exercitusq; ita duxe-
 runt, ita imperarunt, ut non aetati ueniam, sed factis praedicationem
 quaesierint. Priores duo, alter apud Caesarem, apud Fran-
 ciscum Gallorum Regem alter, diu fuerunt, et in tanta quidem gra-
 tia, ut Octavianum Caesar non magis quod ei filiam nuptum dede-
 rit, lectissimam & omni muliebri laude eminentissimam fami-
 nam Margaritam Austriam, ut generum diligeret, quam uirtu-
 tis ergo, non minus prope, quam Philippum Hispaniarum Regem,
 unicum filium suum, quem maiestatis & celsitatis causa nomina-
 uis, carum habeat: Horatium Henricus Rex Francisci filius, cui
 filiam desponderet, dignum duxerit. Sed ut illuc, unde digressa
 est, redeat oratio. Cum optimum quocunq; nobilissimum ac sapien-
 tissimum PAVLVVS in uestrum collegium cooptaret: tribusque
 suis nepotibus adscriptis uestrae fuerit assensus cohortationem, faci-
 le profecto declarauit, et Pontificis optimi auctoritatem optimis
 consiliariis muniendi, & cum Reip. optime consului, uim uero et
 prudenter summam dignitatis uestrae habui ratione, et amenter
 uestre

Nepotum
 aliorum lau-
 des.

Margarita
 Austria.

Pauli Re-
 gis.

uestre erga se maxime pie uoluntati obtemperauit. At pulcher-
 rum ille quidem fasti sui tum ex magnorum erga ipsum dum ui-
 ueret, officiorum perpetuitate, tum ex uestro isto pietatis & gra-
 tæ memoriæ plenissimo luctu, ex iis uero maxime, quæ erga suos
 Nepotes præ uobis fertis, minime sane obscuris beneuolentiæ si-
 gnis, fructus iam tulit optatissimos. Et uos, quos ille tanti honoris
 quasi germanitate quadam, cum ueteribus collegis maximis illis
 quidem & clarissimis uiris coniunxit, magnam pro minime uul-
 gari beneficio, sed maiorem (nisi mea me fallit opinio) pro tam
 illustri de uobis tanti Pont. Max. iudicio gratiam debere arbi-

Peroratio
 Pōtificio-
 rum acto-
 rum.

tramine. Collegi Patres, & in quasdam ueluti summas redegi,
 maiore mediusfidius cum breuitatis quam copię cura, Pontificia
 Pauli merita: dum & de eius in summum Deum cultu, deque per-
 petua in homines caritate, de pacificandæ Reip. flagrantissimo
 studio, eiusque rei causa indicto ac prope iam peracto concilio, de
 uestro sæpe repetitis cooptationibus ornato collegio pauca comme-
 morauī. Age uero nunc, si ad PAVLI uitam, mores, actiones,
 formam denique et oris figuram respicias, qui summum orbis ter-
 ræ principatum teneret, dignissimum fuisse, rebus omnibus quæ

Pauli Re-
 gia acta.

huc pertinent exponendis, æque ueritatis ac breuitatis habita ra-
 tione ostendamus. Reges Deorum esse certissimam prolem, inter
 gentes clari sapientia uiri literis prodiderunt: quod scilicet quo ce-
 teris præcellant hominibus, eò uno gradu Diis ipsis inferiores esse
 uideantur. Sed illud longe uerissimum, quod diuinarum uocum
 interpretes & ipsius Dei & hominis IESV CHRISTI san-
 ctissimi legati bonis omnibus facile probarunt: A Deo potesta-

tem

tem Principes accipere: neq. minus qui improbi sint, quam qui bo-
ni. Tantum uero interesse, quod illi ad hominum salutem, hi ad
perniciem traditis à Deo opibus utantur. His DEVS tanquam
pastoribus ac uerius suæ uicariis potestatis parentibus populos
committat: Illis tanquam latronibus, aut potius carnificibus cor-
ruptas atque impias ciuitates ad pœnam & cruciatus tradat. Di-
scernuntur uero facile utrorumq. ingenia, ex diuersa imperii ad-
ministratione. Illi temere, furenter, crudeliter, inique, libidinosè
agunt & gerunt omnia: Hi certa ratione ac consilio, mansuete,
elementer, continenter ac moderate. Illos qui in eorum sunt im-
perio populi, natos aliquando fuisse indignissime ferunt: Hi si hu-
manæ iura naturæ paterentur, ne unquam morerentur cuperent.
Optimorum PAVLVM non modo principum simillimum, sed eius
totius, quam maxime diuinus princeps præ se ferre possit, diuini-
tatis compotè fuisse planissime perspicimus, si cogitata diuinitus,
suscepta diuinitus, ab eo denique omnia à principatus initii ad
extremum humanæ uitæ balitum, diuinitus perfectà ostenderi-
mus. Diuinæ sunt illæ, quinimmo summi Dei maxime proprie
facultates due, per quas sempiternus ipse Deus se ipso maxime
fruitur, & mundus uniuersus, singuleque mundi partes Dei men-
te fruuntur. Cognoscendi atque intelligendi est altera: Prouiden-
di altera ac benigne faciendi. Ab illa inest in Deo omnis om-
nium rerum scientia: Ab hac extitit aliquando à Deo omnium qui
bus fruimur Dei munerum, tam prolixa tamque copiosa largi-
tas: Atq. ab hoc fonte omnis in hominum genus, tum res omnes
inuestigandi & contemplandi, tum bene & præclare gerendi sa-
cultas

Virtutes
Regiæ.

libupoli

cultas deriuauit. Harum in PAVLO utra se non ostendit? non extulit? non supra humane nature lumen effulsit? In quo uero unquam Principe salutaris illa ciuitatibus potestatis ac sapientie coniunctio certior fuit, aut euidentior? Quod: si beatas fore Resp. censuit grauißimus ille intelligendi ac dicendi. Auctor & Magister, quarum uel sapientes gubernacula tenerent, uel in quibus ii, qui summe rerum præessent, se sapientie studiis dedidissent: Cui unquam principi felicitatem suam hæc Rom. resp. quæ ecclesie nomine celebratur, acceptam referat, si non fuit PAV-

Doctrina.

LO imperante felicissima? Is enim Patres (atque id uestrus omnium tacitis fretus iudiciis ac testimoniis fidenier atque intrepide dicam) tam fuit in omni uel diuinarum, uel humanarum rerum cognitione solers, tamq: earum omnium, quas in summo atq: optimo principe esse æquum est, literarum compos, ut si in aliquo fortasse uno uel facultatum, uel studiorum genere unum aliquem superiorum ætatum non superarit, neminem plane in uniuerso scientiarum & doctrinarum omnium contentu illo & ueluti choro, quam Græci Philosophiam, humanitatem nostri appellant, qui cum eo comparetur, ut omnia memoria repetas totius antiquitatis exempla, facile reperias. Et quoniam insite in animo rerum notiones, quales eæ sint, tum demum perspiciuntur, cum eas mentis quasi quosdam partus, oratio ad hominum aures pertulerit. Ea fuit Paulus in dicendo copia, grauitate, ubertate: Is uel sermones uel perpetuas orationes exornabat insignibus. Eo etiam cum opus foret, lepore atque urbanitate condebat: ut neq: rerum maximarum cognitio orationi, neque ulla omnino, qua uel edo-

Eloquētia

rit. Ea fuit Paulus in dicendo copia, grauitate, ubertate: Is uel sermones uel perpetuas orationes exornabat insignibus. Eo etiam cum opus foret, lepore atque urbanitate condebat: ut neq: rerum maximarum cognitio orationi, neque ulla omnino, qua uel edo-

ceri,

ceri, uel affici, uel recreari auditores oporteret, eloquentiæ pars, eius intelligentiæ atq: admirabili ingeni capacitati ulla ex parte deesse uideretur. Commentitium ne id haberetur uereri possem, Patres, nisi è uestris tum sæpe singulorum, tum plurium sermonibus cognouissem, nunquam Pauli orationem in Curia è superiori loco de rebus maximis referentis, non amplam ac magnificam, non elegantem & politam, non omni ex parte undiq: admirabilem uideri solitam. Sermionibus certe, qui uel eo in cubiculo, sedente inter paucos, uel dum accumberet, circumstante fere semper doctissimorum hominum corona haberentur, tam frequens interfui, quam alius quouis loci ordinisq: mei. Animaduvertebam quæstionē nullam in dictionem cadere posse, siue de uita et moribus, de ciuili sci licet ac populari quauis ratione, siue de naturæ obscuritate, siue de sacris diuinisq: rebus, atq: omnino retrufis atq: abditis in medijs à communi uitæ consuetudine remotissimarum disciplinarum latebris differeretur, quin de iis PAVLVS et non omniū sentiret scientissime, et non promptissime simul & grauissime loqueretur. Iam uero si de exquisiti cuiuspiā artificii, ut pingendi, fingendi, ex ædificandi quouis genere ageretur, non illi ipsi profecto, qui in iis essent artibus callidissimi atq: experientissimi, de iis operibus, quoru se absolutionē aut soli, aut cum paucis præstare posse profiteretur, uel acutius iudicabāt, uel probabilius, quid addi demiq: aut immutari oporteret, ostendebāt. Quo circa ab eo discedebat nemo, qui cū immensum prope rerū usum uitæ diuturnitati ac dignitati, multiplice et exquisitam eruditionē exactæ in optimis studiis ætati tribuisset, incomparabilem certe dicendi copiam, uarietatem, iucun-

ditatem atque in primis in affecta iam senectute memoriæ firmitatem summam non admiraretur. Nemo qui hæc à natura data, aut ulla humana industria comparata, & non à Deo ipso, de manu (quod aiunt) tradita iudicaret. Ipse equidem ex eius conspectu & sermombus incredibilem quandam tum oculis, tum auribus uoluptatem capiebam: Nam si latine loqueretur, apte quidem ad nostri temporis consuetudinem atque accommodate dici omnia intelligebam: Sed ita, ut neque purius, neque elegantius ueteres illos latine lingue auctores, qui sæculis eruditissimis floruerunt, locuturos fuisse putarem: Iam si Græcorum uel sententias, uel uersus, quod in promptu illi erat maxime, pronunciaret, priscum orationis Græcæ sonum, & plane atticam uocum appellationem, mihi uidebar agnoscere. Illum itaque cum audiebam, ueniebat protinus in mentem, non cum iis tantum principibus uiris, qui patrum memoria literarum atque eruditionis laude in Italia præstiterunt, comparari eum posse, *Alfonso Neapolitanorum Rege, Laurentio Medice, Guidone Feltrio, Pico Mirandulano.* Sed tales tacita mecum cogitatione fuisse statuebam, uel *Periclen* illum *Anaxagoræ* auditorem, qui sapientia atque eloquentia *Atheniensium* ciuitatem annos plurimos rexit: Tam claros olim omni sapientiæ gloria apud *Lacedæmonios Xenophontis Agésilau,* Apud *Thebanos Lysidis Tarentini* præceptis *Epaminundam* extitisse. Quatuor ego Romanos principes & imperio, & literarum exacta quadam cognitione eminuisse in ueterum libris comperio: *Cæsarem dictatorem, C. Cæsarem Octavianum, Aelium Hadrianum, M. Antonium* cognomento philosophum.

His

His ego omnibus tam fuisse literis parem, quam, quod dubitari non potest, morum probitate ac sapientia anteesse Paulum censeo. Atque omnino, quod Tacito Imp. aliquando curiam totam acclamasse legimus, ad Pauli tempora multo iustius referuari debuisse. Quis melius, quam lueratus imperat? Et sane in eius facie intuens, non ingenii tantum, & præclare atque omnino diuinitus constitutæ mentis certissimum lumen, sed maiestatis etiam atque imperii perspicuis quibusdam expressam signis, oculorum, uultus, manuum, membrorum omnium, totius denique stature modulo conformatam, ad summam ac præcipuam dignitatem speciem, cum tacita quadam & iucundissima admiratione aspicebam, atque ociose, ita ut expleri tamen non possem, singula contemplanbar. Sed quoniam, ut in corporis figura se animi habitus ostendit, multoque magis eum oratio proferat & enunciet, locupletiora tamen sunt & clariora intimorum sensuum, & suarum cuiusque uoluntatum testimonia, quæ quis egerit ac fecerit: Acta iam ipsa factaque Pauli urbi nota & spectata, & ad extremos iam orbis terrarum recessus illustri fama perlata, qualis, quantusque princeps, quamque dignus fuerit, qui non Pontificum modo, sed Regum etiam omnium uirtute ac sapientia maximus haberetur, omni posteritati, si mihi id optare, ius fasque est, per hanc laudationem meam fidem faciant. Hic ego non eas, quæ uel requiri, uel laudari solite sunt in priuatis etiam hominibus uirtutes persequor, pudorem, continentiam, frugalitatem, modestiam, lenitatem. Hæc & horum similia humani animi ornamenta, diu certis honorum ordinibus contineretur, quanto opere Farnesius coluerit suis

Oris dignitas.

ingil zinO

.21

non est prorsus locis prætermissum. Neq; statim ut supra omnem ordinem esse capit, earum sibi laudum decus aut non retinendæ, aut non potius nihil minus, quam supremæ dignitatis fastigium poposcisset, amplificandum censuit. Silentio itaq; humiliores quædam (ut ita dixerim) eius laudes inuoluuntur, nihil de innocentia dicam, nihil de humanitate, nihil de comitate, nihil de mansuetudine et suauitate, quibus certe laudibus cum æqualibus, tum suis in quouis ordine collegis ita antecelluit, ut sine inuidia mirificā sibi omnium beneuolentiam conciliaret. Sui sane corporis, et salubrium atq; insalubrium notitia, motus & quietis tempestiuitate obeunda, quibus rebus in tam longum sibi spacium uitam prorogauit, medicorum omnium peritiam superabat. Sed multo ille quidem magis abstinencia, sobrietate. Sed harum ego pulcherrimarum quasi animi dotium, facile patior nullam pene uideri à me rationem habitam, modo ut quæ in generosissimo principe præcipua quadam cum admiratione spectantur, iustitiæ, fidei, magnificentiæ, liberalitatis, clementiæ, placabilitatis, facilitatis, constantiæ, auctoritatis opera, non indiligentissime uisus fuero collegisse. Atque in summa ostendero, omnium eum cuius prudentiæ partium, quas animo & memoria compræhensus haberet, magna nobis & perlustraria documenta reliquisse. Nam cum ille in omni uitæ, munerumq; suorū parte nunquam ab officio discessisset, nisi eos omnes qui familiæ suæ nomine continerentur, sui quamssimiltimos peroptuo præstitisset, iure de sua existimatione multum detrahi posse putabat. Fuit igitur illud plane nouum, atq; omnino in omnibus regnis ac principatibus inusitatum, quod in tanto familiarium domesticorum

Familiarium, necessario, nepotum probitas, abstinentia.

meſſicorum numero, ne unus quidem repertus fuerit, qui per .xv. ipsos huius pontificatus annos iniuria quenquam laceſſierit, contumelioſus in quenquam fuerit, dicto, factoue alteru ledendi, aut licentiam ſe habere arbitraretur: aut improbe ſi feciſſet, impunitate ſperaret. Ea erat totius domus diſciplina, ut de principis gratia quiuſ recte uiuendi ratione & officiorum diligentia certaret: Cum accumbenti, ſedentiue miniſtri ſui aſſiſterent, chorum illum quendam, non coronam diceres: Intentos ad eius nutus & directos omnes oculos habebant: Quæ dicerentur ſummo cum ſilencio auſcultabant: Nemo, niſi cum maxime opus erat, ac niſi quâ parcifſime loquebatur. Atque eò erat in hiſ & ſui officii obſeruantia, & à cupiditatibus uacatio admirabilior: quod eos PAVLVS non triſti ſeueritate, nõ imperandi acerbitate, ſed affabilitate alios, alios beneficiis, hoſ tempeſtiuiſ laudationibus, illoſ miribus monitiſ & leniſſimiſ obiurgationibus, aſpectuſ ipſiuſ uerenda quadam maiestate, & ea maxime quam de eiſ diuinitate habebant, opinionis uet auctoritate omneſ in officio cõtinebat. Sed quid ego eorũ qui honoratioribuſ apud eum muneriſ fungebantur, continentiam et uerecundiã admirer? Multi ſane ex illiſ, (quod in Regum domibuſ uſu euenit) et clauo loco et non uulgariſ fueſe honoribuſ præditi: in ordinem tamen eoſ cotidiani officii ratio adducebat: Ne quid quod grauiore dignũ eſſet reprehentione, committerent, tacita quedam inter ipſoſ et de principis gratia maxime ſolicitã emulatio, tum aliquiſ etiam animaduerſionis metus deterrebat. Sed quid ipſiuſ nepoteſ Farnęſi quatuor?

Sfortia

*Sfortiæ iam puberes tres? Quam illi non peruulgato prædiu-
 tum ac beatorum iuuenum more, & libidines suas domitas habue-
 runt, atque omnes cupiditates cohercuerunt? Recordamini, Pa-
 tres (uidistis enim uestrum aliquot, audire omnes potuistis) quam
 fuerit aliorum Pontificiorum nepotum effrenata audacia, quon-
 intoleranda fuerit sociis atq; huius imperii ciuitatibus, eorum petu-
 lantia, superbia, crudelitas. Cum illis Pauli nepotum uitam &
 mores conferte: statuetis profecto his humanius ac moderatius ni-
 hil: Illis nihil ferocius, nihil seuius, nihil impotentius. Quid enim
 hi florentes ætatis, circumfluentes opibus, affectatoribus &
 clientibus stipati aut per uim unquam fecerunt? aut quid cui un-
 quam inuito ademerunt? in quamue domum probrum aut insa-
 miam intulerunt? Quid summo aut infimo cuiquam debuerunt,
 quod aut sponte non dissoluerint, aut à se exigere non æquissimo ani-
 mo tulerint? Quanquam quid ego uiros, & eos uiros nihil unquam
 egisse turpiter dicam, nullo se unquam scelere obligasse, quorum
 non modo tanta sit, quanta in nullis unquam fuit iuuentutis prin-
 cipibus, eximie indolis expectatio, sed tam præclara cotidie ma-
 gnarum uirtutum se decora in publicam hominum lucem profe-
 rant, ut quiuis facile eos possit Pauli nepotes atque alumnos agno-
 scere? Cum hanc etiam, quæ ex pulcherrima & rectissima nepo-
 tum institutione in Pauli nomen redundat, gloriam mirifice au-
 geat *Victoria Farnesia* Guidonis Baldi Vrbinatiui Ducis uxor,
Victoria Farnesia. quæ cum iis omnibus laudibus semper excelluerit, quas in princi-
 pe & *Augusta* femina inesse oporteat, ut nuper Romanis uir-
 ginibus, pudoris, modestiæ, probitatis lumen prætulit, ita nunc
 summi*

summi loci matronis omnibus fidei, officii, pietatis, humanitatis, mansuetudinis, atque in primis sanctissimi in coniugem suum, è quo iam mater est, amoris, maiora in dies atque illustriora pergit exempla edere. Ac tales quidem Paulus domesticas apparitiones ac necessitudines præstitit. Quid uero? amicitias humane Qualis in
uitæ firmissimum præsidium quemadmodum coluerit, ex eo ma-
xime perspicuum est, quod cum & longa ætas, & magna tempo-
rum uarietas, & singulare ipsius de bonis benemerendi studium,
infinitum prope ei amicorum numerum comparasset, neminem
omnino beneuolentia sua dignum duxit, in quo aut amoris per-
petuitatem & constantiam, aut in suscipiendis cum opus foret,
ipsius causa laboribus, aut periculis adeundis animi alacritatem
desiderarit. Violatæ certe fidei unus tantum ei pœnas maiesta-
tis damnatus dedit. Atque is quidem non modo secum seuerè agi
questus non est, sed facinoris quam commeruisset, æstimationem
ex Pauli clementia sibi allenuatam ultro confessus. Permanserunt
reliqui in officio: & fidelitatis profecto suæ, nemo non fructum
tulit. Nam statim ut ad Pontificatum Max. peruenit, & ui-
uentibus ac præsentibus gratiam retulit, et absentes pro sui quen-
que loci atque ordinis ratione, ad certos honores & munera, non-
nullos etiam ad uestram istam, Patres, purpuram, tum ex Italiae
urbibus, tum ex Prouinciis euocauit: Tantaque est eos caritate
ac beneficentia complexus, ut ambigi non posset, si præclara illa
scientiarum lumina, Ficini, Lati, Mirandule, Politiani, quos ado-
lescens coluerat, ad hæc tempora peruenire potuissent, cupide om-
nes & liberaliter ornaturum fuisse. Sed cum mors illi hæc facul-
tatem

De popu-
lorum in
ipsius Pō-
tificatu
fœlicita-
te.

tatem iam pridem præripuisset, tam frequenter eos in ore habebat, ita sua exornabat cōmemoratione, ut facile intelligi posset, non minus pie ab eo mortuos desiderari, quam fuissent uiuentes magnifice honestati. Age uero, qui se talem domesticis familiaribus, talem amicis præbuerit, qualis in populos ac ciuitates fuerit, quæ in ipsius ditione fuerunt, uideamus. Primum ille ut se imperante quam beatissime essent, præcipuæ & antiquissimæ curæ sibi esse debere cum intelligeret, legatos in eas suos & præfectos dimisit, uiros graues & ornatos, & spectata cum uitæ integritate, tum nominis auctoritate. Per eos & bonis legibus, quas antiquari fuisset superiorum præsidium (ut lenissime dicam) incuria, restitutis & nouis perlatis, passimque per oppida omnia ac municipia seuerissimis propositis edictis, breui omnem facinorum improbis licentiam ademit. Impunitatē cohibuit. Vm omnem compres-
sit: Factiosos à turbulentis cogitationibus pœnæ metu deterruit: Optimum quenque ad quietis, ocii ac tranquillitatis minime dubiam spem erexit & excitauit. Ciuum in primis concordie, iurisdictionis æquabilitate ut consuleretur, operam dedit. Nullo itaq; tempore, aut æquiore conditione cum aduersario experiri licitum est in priuatis iudiciis, aut ex iuris, æqui boni præscripto, lites & controuersie diligentius cognite. Nunquam potentiores gratia, aut pecunia ad tenuiores opprimendos minus ualuerunt. Ac certe sublati corruptelis & largitionibus, nunquam minus differendis uadimoniis, aut comperendinationibus iterandis, uel à patronis, uel à iudicibus obscuriores persone aut expilate, aut lacerate. Quid nunquam minus dico? cum certis quæsitōribus
in ma-

in magistratus anquirendi, et populis prouocandi potestate data, nunquam in eos grauius fuerit animaduersum, qui aut iniquis iudiciorum disceptationibus, aut ullo uel calumniarum, uel cauillationum, uel quouis iniuriosarum actionum genere, cuiusquam bonis & fame periculum creare conati fuissent. Iam uero in criminibus plebendis adhibita quidem est seueritas, ne remissior scilicet lenitas in licentia deduceretur exemplum. Sed ita capitalioribus est fraudibus pena irrogata, ut suus tamen in iis cum tolerabilioribus essent, noxiis clementie, suus fuerit semper misericordie locus. *Agno hæc à uobis, Patres optimi atque amplissimi, et ab omnibus hac ornatisimorum uirorum corona cum assensu auditi ex eo intelligo, quod tantum silentium ut ab initio Pauli laudationi datum in nihil dubitare potuerim, orationi certe meæ, præsertim uero si longius ea proueretur, tam perpetuam attentionem optare magis quam sperare debui. Sed si quis fortasse, quæ à me de ciuitatum iudiciis dicta sunt, commentitia & quasi de commentariis qui de iudicum officii conscripti sunt, sumpta arbutatur, is qui status fuerit singularum ciuitatum sub Pauli imperio, ratione & animo complectatur. Intelliget profecto, intelliget, non fuisse ciuitates tantæ concordie, tanti animorum consensus, tantæ seueritatis, tantæ denique omnium ordinum hilaritatis ac letitiæ compotes futuras, nisi optimarum legum sanctitate, earum finisset felicitati prospectum, nisi iuris æquabilitate, iudiciorum ac iurisdictionis tum seueritate, tum moderatione perfectum esset, ut sua quouis facile ac sine molestia tueretur, ab alienis mentem, oculos, manus abstineret. Quod si ægra plerumque & grauer affe*

Et ad idem prope desperata corpora, tum medicorum solertia, tum eorum, qui illis assederint, diligentia, fide, assiduitate recreata, et ad bonam ualitudinem restituta consitemur. Cur quisquam populorum salutem, et incolumitatem à PAVLI consilio et providentia, atque eorum qui pro PAVLO urbibus præsuerunt, integritate, & fideliter ac scienter munerum suorum obita procuracione profectam non existimat? Verum enim in PAVLI pontificatu non salus tantum & incolumitas civitatibus obtigit: sed neque unquam opibus firmiores, copiis locupletiores, uirtute & optimarum artium studiis honestiores fuerunt. Externa bella procul ab Italia quasi uisceribus amota, civilibus contentiombus, rixis & uirgus, unde omnis existere consuevit seditionum atrocitas, publici priuatiq; iuris nutu & auctoritate freni fuerant iniecti. Placato supplicationibus, & diuinarum rerum accuratissima administratione, atq; in primis emendanda uitæ ratione, summo Deo, nulli unquam ætati hominum maior salubritas contigerat. Vno tantum incommodo (ut nulla est humanarum rerum satis plena & absoluta felicitas) unico inquam incommodo, ac uerius calamitate, infimæ & egentis multitudinis fortune affligi poterat: nisi eius quoque calamitatis metum parentis optimæ ac sanctissimi uigilantia remouisset. Agrorum communis toti fere Italiae, & pertimax quedam in multos annos sterilitas non mediocri famis periculum importarat. Dimissis in longinquas provincias frumentariis, ita ei periculo PAVLVS occurrit, ut magno frumenti numero comportato, nulla suæ ditionis ciuitas alimenta desiderarit, & annonæ charitatem non maxime tolerabilem senserit. Facile

uero omnis opificum turba, & ii omnes, quibus esset è cotidiano
 quæstu uictus quæritandus, esse frumenti precium paulo impen-
 sius patiebantur: dum earum calamitatum, quas proximis supe-
 rioribus fere omnibus annis perpeffi fuerant, metu carerent: ne sci-
 licet aut militum itineribus, et sæpe hostium populationibus agri,
 aut magnorum exercituum hybernis urbes essent infestæ. Ac ne
 dum inter ciues ob seditionum tumultus gladii distringerentur,
 ipsi clausis tabernis atque officinis, suam coniugumque suarum,
 & paruulorum liberum famem sceneratò corrasis numulis sola-
 rentur. Quantos uero fructus, quanta commoda, libera commer-
 cia, tuta itinera, *Aemiliæ, Flaminie, Aureliæ, Cassiæ, Vale-
 riæ, Appiæ* oppidis, uicis denique omnibus ac diuerticulis attule-
 runt, non latrocinii solum, sed latronum etiam nomine, per eo-
 rum, quos Paulus ciuitatibus præfecerat, curam ac diligentiam
 oppresso, sublato, penitus extincto? Neque enim ullo ante un-
 quam tempore, maiore uel mercatorum, uel uiatorum frequentia
 cum urbs ipsa, tum *Italiæ* fuerunt, qua urbs adiri solet, partes ce-
 lebratæ: Cum magnos etiam hominum in urbem concursus, uel
 unus tanti principis, tanq. *Augusti* ac tam uenerandæ maiesta-
 tis uisendi studium pertraheret. In magna igitur rerum omniū co-
 pia ac perpetua populorum celebritate, et à superiorū temporum
 calamitatibus respirauiamus, et insolita quadam letitia exultaui-
 mus. Festi dies cum solēnibus pompis agitari, nuptiæ inter ordines
 creberrimæ cōiungi, soboles agnascere, iuuentus propagari, excoli
 liberaliū studiorum discipline nunquam desit: Extulit se et pro-
 pe ad suum profecit apicē eloquentia, quam togatorū eloquentissi-

Literæ et
 bonæ ar-
 tes om-
 nes illu-
 stratæ.

mus ille et ingenio ac literis abundantissimus, pacis comitem, ocii-
 que sociam et bene constitutarum ciuitatum alumnam dixit. Iam
 uero artes quædam ingenuis finitimæ, psallendi, canendi, fingen-
 di, pingendi, ædificandi, eò propecte sunt dignitatis, tamque ma-
 gnos ac nobiles auctores hæc sunt, ut qui meliores eas reddi, aut
 magis expoliri atque illustrari posse putet, is naturam & artem,
 quod sapientes fieri negant, ad infinitatem progredi posse spera-
 re ausit. Rei militaris scientia, remota hostilium dimicationum
 necessitate, in umbratili quadam & ludicra exercitatione reten-
 ta: Ne cum extra Italiam, contra alienas à nomine rituq; nostro
 gentes delectus haberi, & legiones educi opus foret, rudes plane
 ad bellicam uirtutem, & non optime instituti & comparati no-
 stri essent Tyrones. Ludi itaque cum sæpe intra urbium mœnia,
 ad equestris pedestrisque pugne imaginem fierent, & iis populi
 spectaculis oblectabantur, & iuuenum corpora ad Castrenses
 labores, atq; ad omnis fortitudinis munia exercebantur. Atque
 hic fuit earum, quæ Romanæ Reip. parent, ciuitatum status. Hæc
 temporum tranquillitatem, hanc uitæ elegantiam & honestatē,
 PAVLI prudentiæ, atq; æquitati debere se, omnia latinorum, Sa-
 binorum, Piceni, Flaminie & Aemilie oppida publicis elogi-
 rum, statuarum & imaginum monumentis testatum ut omni esset
 posteritati, grate pieque curarunt. In his enim maxime locis, aut
 nihil omnino unquam turbatū, aut si quid per paucorum factio-
 sos conatus tentatū est, omnis est motus celerius quam uel sen-
 tiri potuerit, compressus. Hæc certe tempora summus ille summi
 Dei interpres uaticinatus illis carminibus uideri potest. Erit

De Regiis
 Pauli quo
 ad re Bel-
 licam uir
 tutibus

12. 17. 17
 12. 17. 17
 12. 17. 17
 12. 17. 17

opus iustitiæ pax: Cultus iustitiæ silentium: In omne posterum
 ævum securitas: conquiescet populus meus in pulchritudine pa-
 cis: In tabernaculis fiducia; & in requie opulenta. Quorum uti-
 nam temporum, Patres, luceat nobis per diuinam clementiam cur-
 sum retinere: Luceat nobis aliam & augustam pacem, Luceat que
 præsentem hanc et auream (ut ita dicam) libertatem, Luceat que
 nobis diuini senis, cuius nunc in conspectu nostro exanimus cor-
 pus iacet, consilium & sapientia peperit atque effecit, ocia retine-
 re. Atque ut retineamus, in uestre Patres, positum magna ex
 parte est incorruptæ mentis, atque incorrupti iudicii, quam ad-
 ferendum de PAVLI successore suffragium adhibueritis, integrita-
 te. In eius perpetua & constantissima positum est, quem uos in
 PAVLI solio collocaueritis, PAVLI uirtutū imitatione. Sed insti-
 tutam nos oratione persequamur, et de reliquis magni huius prin-
 cipis laudibus, carptim pauca & primoribus ueluti labiis deguste-
 mus. Hic ego Patres, non defuturus intelligo, qui laudationi huic
 meæ, quatenus Pont. Max. conuenire uideatur, assentiantur. Et
 pietate ac religione, iis quos ante nominavi Pontificibus Max.
 & aliis quibuscunque, per quorum solertiam doctrinam, sancti-
 moniam Christi Resp. aucta & propagata est, non inferiorem
 fuisse concedant. In imperii etiam omni iure ac dignitate tuenda
 & defendenda, omnibus denique meritis in socias ciuitates ac po-
 pulos, iis quos omnis posteritas non ut Pontifices tantum Max.
 sed ut principes etiam optimos ac prudentissimos, summaq; uir-
 tutū magnitudine multo præstatisimos, magna et perpetua digna-
 bitur nominis prædicatione, Martino & Nicolao Quintis: Pio
 & Iulio

& Iulio secundis, Leone. x. Clemente. vii. iis inquam PAVLVM
 Tertium maiore multo digniorem gloria consueantur: Nemp
 quod illis Romanæ Reip. gubernacula & sceptrā tenentibus, ea
 quam PAVLI ingenio, industrie, sapientiæ fuisse tribuendam osten
 dimus, non urbi Romæ, non sociis urbibus tranquillitas tempo
 rum & securitas contigerit. Nam & bellis externis arsis Italia,
 & perniciosissimis ciuitates seditionibus laborarunt: Vniuersa
 Respub. & ipsa in primis urbs modo secessionibus est conflicta
 ta, modo funestis insolentissimarum factionum digladiationibus
 cruentata. Mitto fugas, exilia, cædes: Mitto prænunciatam to
 ties ostentis, prodigiis, seuissimisque Tyberis eluuiionibus Deum
 iram, quam toties intolerandæ famis, & foetissimæ pestilentie lue
 runt populi atrocitate. Prætereo, ne ingentis doloris & luctuosiss
 imæ cladis memoriam refricem, importunissimam ac seuissimam
 urbis direptionem, profanorum, sacrorumque capitum uolatio
 nem, sacrosancti collegii & ipsius Pont. Max. impiam illam &
 auditu ipso exhorrescendam oppressionem. Ab his tot tantisq;
 malis uacuitas, qua quintum iam & decimum ipsum annum per
 frui potuimus, in excelsiore multo, quam superiores qui sunt à me
 paulo ante nominati Pontifices, PAVLVM gloriæ collocat gradie
 In maiore enim multo est laude ponendum, ne bella gerenda es
 sent prouidisse, quam uel fortissime bellorum impetus sustinuisse.
 Est enim hoc plerunque uel necessarie fortitudinis, uel nimie ad
 subeundam fortune aleam procliuatatis. Neque profecto non
 multo melior est gubernator ille putandus, qui procella impen
 dente in portum se receperit, quam qui cum se aduersissima tem
 pestati

pestali commiserit, de sua & uectorum salute in dubium uenerit: Quocirca nemo satis intelligens fuerit satisque rerum æquus æstimator, qui in urbana quoque ac ciuili Reipub. moderandæ ac tuendæ ratione; non ante cæteros quoscunque Pontifices PAVLVM ponat. Arguet tamen fortasse me, quod in PAVLO exornando cupidius prouchar, ac mihi fere nimis indulgeam: qui quasi nesciam regias atque imperatorias uirtutes non urbium manibus, aut togæ muneribus contineri, sed in armis multo magis elucere, se in regendis ac ducendis agminibus, sigms conferendis, urbibus oppugnandis ostentare, PAVLVM tamen parem facere summis coner principibus, quorum maxime illustres fuere de ferocissimis hostibus uictoriæ, quique bellica uirtute imperium iisdem prope mundi regionibus terminarunt, quibus sol cursus definit suos, cum iam ante demonstraturum me professus fuerim, unum, qui summum orbis terræ principatum teneret, dignissimum fuisse. At enim non deerunt qui suum hoc esse deus dicent, suaq; illorum ingenia, quorum trophæa ac triumphis publicis titulorum notis adhuc extant incisi, multiq; (ut ita dicam) uiuacius grauißimorum scriptorum monumentis ad nominis immortalitatem propagantur: Duplicem hanc laudem Cæsaribus, Octauiano, Vespasiano, Tito, Traiano, Constantino, multisque aliis regibus atq; imperatoribus relinquendum: Militarem certe gloriam ad Pauli uitam nulla posse ratione accommodari. Ego uero ut negare non possim, ei qui ad pacis fuerit studia multo propensissimus, atque esse debuerit, non fuisse ad belli ullum munus descendendum: Sic affirmare non dubitem, si quod

eum tempus, si qua communis ratio salutis, ad iusti pique belli alicuius expeditionem inuitasset, non consilium, non uirtutem, non inuicti animi robur, non deniq: corporis quanta esse possit in tam grandi natu imperatore, ei tolerantiam fuisse defuutam. Non semper praeclaros animi habitus aut expedit, aut usu euenit quasi in actum deduci. In quo inest artis & uirtutis alicuius habilitas quaedam, etiam si nullum extet opus, eius tamen qua pollet, facultatis satis egregiam laudem fuerit consecutus, cum quod praestare potuerit, id necesse non esse praestabilius duxerit. Pacatissima illa tempora & plane uti appellata fuerunt, aurea, Saturnum uel in Creta; uel in Italia regnante regis nomine & auctoritate non minus dignata sunt, quam Iouem eius filium, & successorem quae consecuta est exorientibus iam bellis aetas. Sed prisca illa nimis & prope poetica. Sed ut ad historiae me certiss. fidem referam, sub ipsas urbis Romae origines, non fuit aut primi parentis & conditoris Romuli ferox et bellicosum ingenium, aut Tulli uehemens illa ad arma procliuitas, quam Numae Pompilii qui medius inter hos regnauit, pacatum & conuersum ad religionem & sanctitatem, ut tunc ferebant tempora, constituendam, imperium, regio nomine dignior. Illorum consilii fuit urbs amplior: huius tutior; Per illos formidolosior: per hunc fauorabilior, ac finitimis populis numinum maiestate, quam ullis uel hominum, uel manuum praefidiis munitior. Illum ipsum, cuius paulo ante mentionem feci, Caes. Octauianum, magis credo aut ciuilia, aut externa bella, quam Ianus clausus, pace terra mariq: parata, nobilitarunt. At perpetuae pacis temporibus & Augusti cognomen S. C. meruit et pri-

mus post Marcum Tullium Ciceronem est pater patriæ salutatus. Bella gerentem ita oderant homines, ut nunquam natum malent; ita pacem colentem dilexerunt, ut optare auderent ne unquam moreretur. Eadem in Antoninis Pio, & Philosopho fuit ratio, eadem in Aelio Pertinace, eadem in Decio, quos omnes Patriæ parentes cognomento à populo Romano appellatos, ueterum nobis scripta tradiderunt. Et optimi illud cognominum omnium amabilissimum & maxime fauorabile, non rerum foris gestarum magnitudo, sed urbana in populum Ro. merita Traiano compararunt. Sed quid ego humanorum exemplorū nitor auctoritate, dum affirmo, magnorum Principum laudes uel in solis pacis operibus satis habere præsidii, ad imperii maiestatem tuendam atq; obtinendam? Summus ipse unicus et sempiternus DEVS, non magis profecto rex regum est omnium, minis cum terret, aut supplicio facinorosos atque impios plectit, quam nos, cum munerum suorum largitate reficit & recreat. Ille etiam ipse DEI filius, DEVS et homo, qui suæ nos uitæ, suæ mortis, sui in uitam atq; in cælum reditus admirandis mysteriis, salui ut essemus effecit, & omnes ad beatissimæ immortalitatis præmia à sempiterna morte excitatos reuocauit, Ille ipse IESVS CHRISTVS, & re & uerbo paternum, et idem cum patre regnum regnorum omnium excelsissimū possidet. Quam uero ille ab armis homines ab horrere iussit, qui et omnem ulciscendi licentiam sublatam uoluit, et iis quos suæ sibi in terris potestatis successores delegit, tanquam certissimam hereditatem, et bonorum omnium maximum, quæq; bona alia omnia continerentur, unicam pacem ad patrem in cælum

Vrbes mu-
nitæ.

lum cum immortalī corpore ascensurus, quasi testamentum in procinctu faciens, unicam inquam pacem reliquit? At enim cum de PAVLI tanquam de magni & omnibus numeris absoluti cuiusdam regis atque imperatoris, laudibus sermo sit, industriam et solertiam ei bellicam non defuisse ostendamus. Primum ille quidem sue ditionis urbes omnes, quibus hostiles uel incurfiones, uel oppugnationes metui possent, in Gallia Cispadana, Umbria, Piceno, Latio, Sabinis, ipsam in primis urbem Romam; muris, arcibus, propugnaculis atque omni operum genere ita munivit, ut neque tanta impensa tantaque celeritate, uel intra tam paucos annos una aliqua urbs, uel plures urbes omnibus annis muniri potuissent uiderentur. Tantam intra earum quas significauimus urbium mœnia, Aenearum balistarum, Tantamque eorum quæ diu seruari possent, comœtuum copiam congestit, ut siue obsidiones propulsandæ forent, siue sustinendæ, uel potius eludendæ, firmamenta nulla ualidiora ad populorum fidem & beneuolentiam accedere potuerint. Ea in singulis cum opus fuit præsidia, eosque præsidiorum præfectos collocauit, ut cum militum fide ac uirtute, magis quam numero pollerent, & fideli ciuitates custodia uterentur, & æuarii rationes immodicis non onerarentur stipendiis. Atque ea quidem fuit in præsidariis omnibus principis uerecundia, ut non modo nihil quod ab illis improbe factum esset, nulli unquam oppidani questi fuerint: Sed quod tales, tamque abstinentes dedisset sibi fortunarum suarum custodes, PAVLO sæpiissime gratias publice ciuitates egerint. Tam uero cum pœni prædones maiore iam quam ante actuariarum et lemborum

borum numero Italiae littora infesta redderent, ad Piraticam illam audaciam coercendam classes duas, ad Anconem unam, alteram ad Centumcellas habuit, ita instructas et ornatas, ut ad has superi, inferique maris oras aut omnino Piratae non accederent, aut si aliquando appulissent, incautius id se, quam insidiosus ausos, malo suo edocerentur. Ad hunc modum PAVLVVS, & imperii sui fines perpetuo tutatus est, et omnium quae in ipsius fuerunt imperio, ciuitatum saluti atque incolumitati consuluit. Et cum ego, qui in rebus cum imperatoris artibus coniunctis consilio optimo sit usus, qui omnia prouiderit experienter, cauerit solerter, confecerit celeriter, Eum inquam spiritus regio atque imperatorios habuisse non putem? Citius illi mihi qui admirandi operis aedificum metatus fuerit, non fuisse dicatur architectus, quam qui imperatoria uel in propulsandis tantum hostium iniuriis munia scientissime obierit, in imperatorum is numero non reponatur. Quid uero, cum semel atque iterum futuri belli rumores percubissent, qua cura, qua diligentia & delectus habuit, & ueteranorum cohortes sub optimis & praestantissimis Italiae ducibus, per ea loca quo periculum intentari posset, disposuit, et iustos exercitus usque dum omnis tumultus conquiesset, & minae iactari ac proponi desuere fuissent, aluit? Atque illud quidem satis inter omnes constat, quibus PAVLI heroica illa, aut diuina potius animi magnitudo ac sublimitas, illaque, quam paulo ante attigi in imperatorio omni munere fungendo habilitas, familiarius nota fuit, si quod nunquam contendere destituit, Reip. proceres exorare potuisset, ut communi consilio atque opibus, commune sa-

Delectus
habiti ad
vrbiūprz
sidia.

cro sanctæ crucis vexillum secuti, in Turcas bellum terra marique
 susciperent, ei tam iusto sacroque bello, ipsum ipsummet & inter-
 futurum, & præfuturum fuisse. Neque id uobis, Patres, de tam
 generoso, tamque fieræ solidæque gloriæ cupido principe dictu ab-
 surdum uideri debet. Nam & animi immensam illam, & maxi-
 me piam alacritatem inuissæ atque incitassæ, unice religionis quo
 flagrabat amor, restituenda Christianis populis, qui nunc misere-
 rabiliter immanissimis hostibus seruiunt, pristina libertatis spes,
 extorquenda de sæui ac truculenti Tyranni manibus Græciæ,
 cuius à puero linguam, literas, disciplinas adamarat, uehemens et
 iniques cupiditas. Corpus, uti scitis, natura siccum, frequentique
 motu, urbanis & agrestibus ambulationibus, multis & singulis
 itineribus exercitum habuit: labores unus libentissime ac de in-
 dustria uoluntarios tulerat, ut perferre aliquando posset etiam ne-
 cessarios. Quam patiens uero fuit æstus & frigoris, qui quoties
 equo esset iter ingressus, uix uento, uix imbre, uix puluere adduci
 posset, ut in lecticam descenderet? Quam uero ille senectuti nun-
 quam indulsit? quamque nunquam illam sibi molestam sensit?
 Qui suadentibus aliquando in longinquiore itinere, domesticis co-
 mitibus ut se respiceret, urbane (ut sæpe solebat) quid me inquit fa-
 cere oportuerit, cum senex fuero? Acute nempe, qui multa,
 quæ senem (ut Poeta inquit) circumueniunt incommoda, nulla
 ipse sentiret, eos qui ut senectutis suæ parceret, hortabantur, illisset.
 Quam uero præclaros uel si classe, uel si pedibus contendisset, co-
 mites, quam certa tuende ualeitudinis præsidia habuisset, mirifi-
 cam sobrietatem, & in cibo potuque, atque omni uictu temperan-
 tiam,

tiam, quibus rebus facile perfecit, ut et pauciores quam quisquam
 unquam princeps somno horas dederit (cum antelucana sepe
 tempora uel in negociis, uel in uia sine ulla molestia consumere
 potuerit) Et medicis uti, unus omnium quam minime necesse ha-
 buerit. Vires itaque corporis, hæc firmas perpetuo & æquas pro
 pe animi uiribus præstitissent: Auxisset uero ingens ob suscep-
 tam atque exorsam tam piam, tamque exoptatam expeditionem
 letitia. Verum cum illum nimis, heu nimis, propagata intestina-
 rum discordiarum semina, pulcherrimi uoti compotem esse non
 fuissent, alia quæ ad armati imperatoris acta quodam modo re-
 ferri possint, rei præclare ac magnifice gerendæ tempora atq; oc-
 casiones non prætermisit. Nam cum ipsummet non deceret, bello
 rum causa quæ non indicerentur ab uniuersa Repub. à sacrorum
 procuratore, à Romanis aris, focus, puluinibus discedere, bellan-
 tem certe cum Turcis Cesarem instructissima classe, & aliquo-
 ties terrestri exercitu pecuniaque plurima iuuat. Eidemq; ferocis-
 mos Germaniæ populos impiis à religione institutisq; maiorum, In Germa-
niam mis-
sa auxilia.
 seditionibus ab alienatos in ordinem cogenti, ab urbe in Noricos
 usq; et Vindelicos lectissimas ad mille et ducentorum equum tur-
 mas, peditum amplius duodecim millia præsidio misit. Quibus sa-
 ne auxiliis, post ueteris illius Ro. Imp. immutationem, quando uel
 maiora, uel meliora, uel ad speciem etiam ipsam pulchriora alpos
 transcendissent, qui ea tunc spectarunt, neq; se uidisse, neq; audisse,
 neq; legisse meminerunt. Eo uero fuerunt admirabiliora, quod
 illis dum Alexander hic Farnesius, PAULI legatus, ducum ue-
 ro nomine, Octavius Farnesius et Sfortia Sanctiflorius impera-
 rent,

rent, ita permansit in officio miles, ut quacunque illa agmina iter facerent, non detrimenta, sed questum, non molestiam, sed uoluptatem populis apportarent. Haberent uero prae oculis, quibus res gestae P. R. ex literarum monumentis cognitae essent, prae illius continentiae exempla: Neque magis fuisse uel Africani, uel Catonis Censorii, uel Aemilii Scauri, abstinentes exercitus putarent. Nos uero qui non prorsus ignorabamus, quae praecipisset, quae monuisset, quibus cum mandatis nepotes tui PAVLVS dimisisset, in trium adolescentium ductu auita consilia et auctoritatem intuebamur. Atque harum quidem copiarum aduentus uix dici possit, uel quantam hostibus trepidationem iniecerit, uel ad quantam successuum spem Caesarianos erexerit. Vidi ego, cum in castris, quae tunc ad Naustadium Vindelicorum castrum in ulteriore Danubii ripa fuerunt, legatum Caesar complexus, alacri uultu atque oratione, optatissimam sibi atque opportunissimam rebus suis, illam tam praecleari subsidii accessionem esse gratulatus. Et profecto quae in Germania ille cohortes, illi duces, illi ex urbano delectu milites, uirtutis suae monumenta reliquerint, nihil attinet hoc loco dicere. Neque enim iam nunc defuerunt, qui suis eas res commentariis expositas in uulgus ediderint. Satis liquido iam ex iis, quae de bellicis rebus à me sunt perstricta, constare arbitror, magni imperatoris PAVLO, neque animi comparationem quandam, neque postremo aliquam etiam declarandae bellicae fortitudinis facultatem defuisse. Sed orationi modum iam meae statuere conanti, cum se mihi plurimae etiam munus offerant regiae summi huius principis uirtutes, neque possint omnes breuiore,

breuiore, quam pro tantarum laudum numero, oratione conclu-
 di, ex iis tamen nonnullas, quæ in PAVLO maxime illustres
 fuerint, maximeque eminuerint, tacitus nullo modo præterire pos-
 sum. Ac primum quidem tanta fuit humanitas, tantaque as-
 fabilitate, ut quos opinione iudicioque suo probasset, & ultro cum
 per amabili quadam oris hilaritate, & uerborum lenitate ad ser-
 mones conferendos inuitaret. Et ad eum nemo sane unquam bo-
 nus accesserit, quin eius oratione semper conciliatus, beneficio se-
 pe deuinctus abierit. Iam uero cum uel opulentissimi reges, tan-
 tas tamen opes non possideant, ut omnium postulatis liberalita-
 te sua possint respondere: Neque tam late potest gratia patere,
 ut omnibus quæ rogant, omnia concedi ius fasque sit: PAVLVS
 nemini cum potuit & licuit, non benignissime fecit. Quod uero
 sibi proximum beneficentiæ locum uindicat, tam fuit omnibus
 aditu facilis, ut non modo salutatores atque interuenientes ad in-
 timos domus recessus admitteret, sed in publicum cotidie, cum per
 uialetudinem liceret, prodians, sui conspectus & aurium omnibus
 cuiusuis gradus & ordinis, summis æque atque infimis copiam fa-
 ceret: Ac dum uel deambularet, uel gestaretur, uel equo, uel læ-
 tica portaretur, diceret apud eum summoia turba quamdiu
 quisque uellet, & audiretur placidissime, atque non a dimitteretur;
 ut ne à priuato quidem homine, equalique suo audientiam sibi bo-
 nignorem fieri potuisse prædicaret. Neque uero tantum ad man-
 suetudinem, gratiamque suam impertendam uisus & lenis fuit:
 sed animaduertendi etiam in eos, à quibus & laesus & latus
 fuisset atrociter, moderatione omnibus cum ueritis, tum recentis
 memoria

Humanitas.

om imiaA
oisatob

Facilitas.

C. C. C.

Clemētia

inmūH
263Animi mo-
deratio.

estilicet

memorie principibus ita antecelluit, ut hac ipsa præcipue regia, atque adeo diuina uirtute, quam bonitatem, placabilitatem, clementiam appellamus, quasi celestibus alis supra omnem humanitatis laudem sublatus, in sempiternas illas exlitum sedes facile ac merito subuolasse credi possit. Nam grauissimis illum, & quibus nemo unquam maioribus, & à quibus minime debuit, prouocatum iniuriis omnes meminimus, & ulciscendi quidem id si optasset, potestatem scimus ei defuturam non fuisse. Nulla tamen in eo unquam iracundie, uel odi uestigia animaduermus. Possem ego, Patres, quibus, quas fraudes, quæ coniuncta cum publico scelere, in ipsum, familiamque ipsius totam, excogitata & patrata facinora ignouisset, commemorare, nisi ipsum quam leniter & misericorditer, dum inter nos uiuere, maximas & fædissimas iniurias obliuisci uoluisset, tam pure nunc & sancte, immortaliam uitā fruētem, illarum etiam rerum, illorumque hominum, parci nominibus uelle putarem. Auocant præterea ad se orationem meam uirtutes due, tam magnæ tamque præclaræ, ut per eas maxime humana cum diuina natura coniungi & copulari uideatur. In earum altera decoris inest, ordinis, atque omnis concinnitatis perpetuitas: In altera magni, elatiquæ animi splendor, & cotidiana hominum conatus exuperans magnorum operum molitio ac designatio: Priorem constantiam, hanc magnificentiam appellamus: Atque ut cæterarum omnium uirtutum, sic harum maxime diuina mente existunt perspicua & illustria exemplaria. Quid enim aliud, eam quam admirari nunquam desinimus, huius tam elegantis, tamque operosæ molis quem mundum dicimus, pulchritudinem

ebriitudinem effecit & expoliuit, quam superiorum inferiorumque
 rerum uarietatis, ac uicissitudinis in eundem semper ordinem, ac
 naturæ consensum continuata ratio? Atque ob hoc quidem pri-
 mum fonte. Constantia ipsa in hominum actiones influxit &
 deriuauit. Iam uero illa cælestium orbium, atque ignium immen-
 sa prope magnitudo, illa è rudi atque informi materia corporum
 omnium architectatio, et ad uniuersitatis formam partium inter
 ipsas coagmentatio, ad diuinorum operum primum admiratio-
 nem, deinde ad quendam imitationis conatum, quantum inter has
 humanarum rerum umbras licitum esset, hominum mentes erexit
 & excitauit. Suos itaque hinc ortus nacta est, quæ magnis maxi-
 me principibus propria semper uirtus fuit, Magnificencia. Ha-
 rum utraq; quosnam sibi ad superos gradus PAVLVS extru-
 xerit uideamus. Ac primum, quid ego, quod uulgo notum est o-
 mnibus, in uite, uictusque parte qualibet, atque omni ocii ac ne-
 gotii dispensatione nihil eo dicam ordinatius, elegantius, decen-
 tius fuisse? Nihil in dictis factisque omnibus grauius? In senatu
 statis diebus habendo, supplicibus libellis subscribendis, in lega-
 tionibus audiendis, priuatorum causis cognoscendis, diuinisque in
 primis rebus procurandis atque celebrandis, fuisse quem sibi se-
 mel præscripsisset, modum æquabiliter semper ac perpetuo, suoque
 maxime tempore ab eo conseruatum? Cum unicum eius factum
 facile quam admirabili constantia fuerit, planum et perspicuum
 faciat: Et quod nam illud fuit? Cum semper inter dissidentes re-
 ges Pont. Max. medium esse debere atque in neutram partem
 propensorem statuisset: Ipse nullis precibus, nullis præmiis, Ne-
 que

Cōstantia

K

Magnifi-
centia.

que cum regna nepotibus, neque cum *Victoria* nepti tunc nubili, regii filii nuptiæ proponerentur, ab optima sententia deduci potuit: Semper inter Gallorum Regem, & *Cæsarem* equalis & medius fuit, ad extremum usque mortalis uitæ punctum: Semper pacis quasi sequestrem, & caduceatorem se gessit. Age uero do *PAULI* publicis operibus, quæ se priscæ ueteris urbis magnificentiæ ferè æquarunt, neq: multa, ne uestram in audiendo patientiam fatigemus, neque omnino nihil, ne tam præclara, tamque regia maximi principis uirtus prætermittatur, dicere aggrediamur. Hac ego in parte non sericam, uel auream uestem ad sacrarii et pontificiæ domus ornatum comparatam, quæ ob textilis operis pulchritudinem cotidie cum summa admiratione spectatur, non facti auri & argenti luculentum pondus, non pontificium diadema triplici præfulgens gemmarum, & margaritarum ordine successoribus relictum, non epuli apparatus, quod bis quot annis, quo die scilicet renunciatus fuerat, quodque coronam cæperat, publice dedit, non *Agonalia*, non ludos in *Testacei* collis area, ex longo temporis interuallo, magnificentius multo quam ante factos memorabo. Speciosa quidem hæc, & ualde etiam ad hominum memoriam insignia: At illa quanto ampliora? quæ cum *DEI* & diuorum cultu, cum *Po. Rom.* ac totius urbanæ multitudinis uitæ ac fortunarum tutela coniunctam magnificentiam habuerunt? *Templa* ad sempiterni *DEI* ac diuorum decus alia dedicauit, alia erexit, alia uetustate collapsa, sartis tectis nouandis ac restituendis instaurauit: Nullam omnino sacrarum ædium sacra ueste, signis, tabulis, argento, & auro plurimo non exornauit.

Publica o
perasacra
& profana

uit. In huius uero ipsius, in qua hodierno die funebris hæc pompa ducitur, Basilicæ exædificationem tâta cura incubuit, ut ea iam prope ad fastigium perducta, substructionum magnificentia, cum sacris omnibus huius ætatis ædibus antecellat, una cum septem illis, quæ olim miraculo toti orbi terrarum fuerunt, operibus comparari posse uideatur. De noua quidem cella, quam PAVLO familiari cognominq: diuo suo dicauit: Deq: Atrio, quod regum legationibus admittendis destinatum, regum nomine celebratur, quid attinet dicere? Duobus his certe operibus, siue sigillati lacunaris artificium, siue picturarum pulchritudinem spectes, nihil esse in urbe uideatur, quod cum à Basilica discesseris, maiore sit cum admiratione conspiciendum. Iam uero uel anniuersarias, uel ex longiore temporis intervallo repetitas supplicationes, ante ipsum certe nemo apparatus instruendas, aut solenniore cum pompa, maiore uel Populi Ro. concursu celebrandas curauit. Intellexit præterea PAVLVS grauissimas atque insensissimas duas urbis felicitati aduersarias esse, crebram & prope annuam pestilentiam, & mænium, quorum omni fere ex parte hosti urbs erat peruia, infirmitatem. Primum igitur qua cura, qua diligentia, qua operum impensa prouidit, ut non minus perpetuo salubres essent urbis regiones, quam ante fuerant pestilentibus morbis infectæ? Nam & stagnantes in uaticani, et Ianiculi ual Paludes ex libus in paludium modum, aquas, quod earum exhalationibus siccatæ. cælum ab ea parte grauius redderetur, deductis fastigio in longinquiora loca fossis, exsiccauit. Vicorum et angiportuum tortuosos Via directos. flexus ita remouit, ut uis ad lineam ubique directis, & recentes

semper auras domus admitterent, & uentorum flatibus quasi liberius præterlabentibus, tum solis tepores lenirentur, tum uero ad tentanda, ledendaque corpora nullam moram noxii halitus haberent. Perfectum itaque est, ut uetere illa urbi, qualis nempe fuit, cum in septem sita esset collibus, salubritate reddita, multis iam partibus plures huc conuenire undique sua transferant domicilia, quam quot ante uel sola inquilinos aeris, æstiu præsertim, fugaret infamia. Nouis cotidie domibus aræ occupantur, Noua cotidie hominum frequentia, quam longe lateque patet, urbs celebratur. Priuata uectigalia prolixiora multo, negotiatorum fides nullis temporum concussa casibus perpetuo stetit, suamque tutata est iam multos annos auctoritatem. Abundat rerum omnium copiis, omni opificiorum genere ciuitas, & quod post ingentes duorum superiorum Pontificatuû calamitates, ut fieri posse crederet, nunquam adduci quisquam potuisset, quando alio unquam tempore aut locupletior, aut pecuniosior fuerit, qui meminerit, aut sciat, nemo reperiatur. Hanc opulentiam, hæc domesticorû bonorû incrementa non dubitabat PAVLVS inuidiosa fore, et ex eo prædatorû cupiditatem uehementer accensum iri. Omnia igitur hæc sibi quam tutissima, quamq. maxime custodita ut essent, præstandû censuit. Acturû itaq. ab Auentini fronte contra Trigeminû portam, per eiusdem montis latera utroq. uersum, ducere instituit, aggere et structura tam illum quidem ualidum, tamq. ullo tormentorum, aut machinarû genere inexpugnabilem, ut omnis inuadende ab ea parte, qua per Hostiensem uiam accessus patet, urbis hosti spes eriperetur. Eodemq. tẽpore mirandi operis propugnaculû ad Capenâ portam contra uia Appiam exci-

Vrbs munita.

tauit. Non poterat quidem PAVLVS earum munitionum ab-
 solutionem sperare, cui ne dum unius quantumvis magnanimi, &
 uiuacis principis etas satis foret, sed ad ea que inchoata essent
 perficienda, nullius cuiusquam sufficere posset principatus diutur-
 nitas. At enim cum cœpisse aliquando tanti semper sapientes fe-
 cerint, ut principium facti, dimidium appellare non dubitarint :
 His certe operum exordiis, & non paruam urbi securitatem pe-
 perit, & iis qui successuri essent, & muniri urbem oportere, et qui
 bus maxime in partibus, et qua esset descriptione munienda, præ-
 monstrandum suscepit. Qua ductus ratione, cum paucis ante an-
 nis per eam murorum partem, que Vaticano imminet, subita ir-
 ruptione in Transtyberinam regionem facta, urbs fuisset à Bar-
 barico exercitu occupata & direpta, eam ipsam partem ualidis-
 simo muro, atque inexpugnabilibus castellis ac propugnaculis, à
 Ianiculo ad Tyberim, à leuo Vaticani cornu ad arcem, que mo-
 li est imposita Hadriani, circunsepsit. Quod certe opus, qui uestri
 Patres, PAVLO successerit, is si absoluendū curarit, et ad PAVLI
 gloriam magno ætatis nostræ plausu aspirarit, & tutū ac saluta-
 rem uniuerso P. R. à belli periculis receptū præbuerit. Videtis Pa-
 tres, quam multis, quamq; ingenti dignissimis admiratione operi-
 bus, quanto religionis amore, quāto publicæ incolumitatis studio,
 se orbi ostentarit, seq; in cælum iam extulerit PAVLI magnifi-
 centia. Ad eam uero, quem attulit cumulum, excelsa illa ædifi-
 cii moles, cum eminentissima & pulcherrima in Capitolino mon-
 te specula? Illustratam aliis ornamentis Capitolium, & præci-
 pua quodam insigni translata illuc ab arca Lateranorum, eque
 stri.

Domus
Farne-
sia.

Per ora-
tio eorū
quæ de
magnifi-
cētia di-
cta sunt.

stri. L. Veri statua, exornatum gradibus Capitolinum Prætorium, munitoque ad Constantini arcum uno, ad rupem Tarpeiam altero cliuo? Quod si his publicis omnibus urbis cum munitionibus, tum exornationibus, ab ipso dimensam & iam prope edificatam, medio inter Floræ campum ac Tyberim spatio, Farnesiam domum adiunxeris, attollentem se supra priuata omnia tectorum culmina, multaque lapidum & columnarum uarietate, luculento antiqui operis statuarum ac signorum numero, strueturæ magnitudine ac totius descriptionis artificio spectabilem, quid in publica, aut priuata ætatis nostræ Maximi, uel Pontificis, uel regis uita splendidius, excelsiusue commemorari possit, reperire aut excogitare profecto nequeas. Nam qui urbem Romanam, qua pauca maiores mœnibus in orbe terrarum urbes, nulla sane augustior, nulla maiestatis plenior, qui urbem ipsam Romanam, sacris & profanis, publicis & priuatis ædificiis, tam multis, quam non multi ante ipsum Pontifices Max. ampliorem atque illustriorem reddiderit, qui quam insalubrem magna sui parte, & cœnosam accepisset, perpetua cœli temperatione fruentem, atque omni soli illuue perpurgatam, quam hosti permeabilem, accessu difficilem, quam denique ruinosam, & prope senio confectam, firmam & ita ad multam temporis diuturnitatem nouatam reliquerit, huic, quos magnificentie titulos, aut inuidere omnis postera ætas debeat, aut non potius secundissimo hominum plausu tribuere? Exposui Patres, quantum cogitatione, & memoria consequi potui, uestri Pontificis Max. acta, uirtutes, merita, quæ illum nulli ferè non parem, multis cum Pontificibus
Max.

Max. tum uero magnis regibus atq; imperatoribus multo superiorem effecerunt: Nunc quoniam summorum uirorum gloria, ut sua à natura primordia, et à uirtute progressus, ita à bono euentu ueluti quandam accipit expolitionem, de PAVLI felicitate DE PAVLI felicitate
eum pauca perstrinxero, huius laudationis iam perorandæ, suam adesse maturitatem intelligam. Vos, patres optimi atque amplissimi, obsecro, postremæ huic orationis meæ parti, pro uestra hodierni mæroris mirifica significatione, aurium atque animorum attentionem tribuite. Qua enim me audiendi patientia profecuti fueritis, eam piæ PAVLI memoriæ, uestroque isti maxime pio luctui condonaueritis. Scio ego Patres, quod facile nos, & sensus communis tacita quædam ratiocinatio docet, & sapientissimorum hominum confirmat sententia, felicitatem supra humanam omnem laudem esse, eamque de se præstare neminem posse. Quare cum in Dei tota ferme sit numine ac potestate, neque crimini aduersæ res cuiquam, neque secundæ, laudi tribui satis certa et recta ratione possunt: Deprecari has nobis licet, illas optare: alteras admiratione debemus, non prædicatione, non uituperatione alteras, sed miseratione potius dignas ducere. Recte agere, & perperam, quod nostræ spontis est, aut in laude, aut in uitio ponendum, quod bene & feliciter euenerit, quidquid aggressi fuerimus, totum est id diuini numinis maiestati, quam multis fortunam libitum est appellare, acceptum referendum. Hunc ego cælestem fauorem tam præsentem ac propitium PAVLO uideo fuisse, ut in quonam principe tam fuerit, tanque perpetuo summæ uirtuti admirabilis quædam adiuncta felicitas, ut omnia antiquita
tis

tis exempla animo & cogitatione percurram, reperire profecto
 nequeam. Quorum enim uita aut nefario scelere fuerit polluta,
 aut graui aliqua corporis calamitate debilitata. Hos ego neuti-
 quam felices, illos etiam miserrimos fuisse dixerim. Potuit ne. *L.*
Sylla, potuit. *L. Metellus* felicitis cognomento satis iure celebra-
 ri, cum illius animus perpetuis agitatus furiis, immanitati, crude-
 litatique suae nullum unquam modum statuerit? Hic annos mul-
 tos oculis captus uixerit? *Alexandri Magni*, & *Timothei Co-*
nonis filii, *Africani* praeterea et *Octauiani Caesaris* felicitatem,
 aequae Latina ac Graeca praedicat historia: Recens, aut certe non
 peruetus memoria. *Alfonsum* maiorem *Neapolitanorum* regem,
PAVLUM & *Iulium* secundos, *Leonem. x.* Pontifices *Max.*
 in felicitum numero reponit. At in illis & uitae probra saepe glo-
 riae splendorem obscurarunt, & aduersi tum publici, tum priua-
 ti casus omnem euentorum prosperitatem contaminarunt. No-
 strorum certe non parum secundae res fuerunt: sed nemo profe-
 cto extraneorum fuerit bonorum satis intelligens aestimator, qui
 non unius *PAULI*, quam illorum omnium sibi malit atq; ex-
 petat felicitatem. Quid enim homini fas fuit optare, quod
PAULO summus *DEVS* non larga & benigna manu imper-
 tuerit? Optabile est bono genere in amplis fortunis atque in opti-
 ma urbe nasci. *PAVLVS* est clarissimis ortus est parentibus, &
 hinc à *Pont. Max.* illinc à praestantissimis clarissimisque Ducib.
 oriundis, iisdemque locupletissimis. Patria ei obtigit urbs haec, di-
 gnitatis, maiestatis et imperii perpetuum domicilium. Praeclarum
 est optimos ineuntis aetatis instituendae duces ac magistros nan-
 cisci.

Felicitas
 partis
 enumeratio
 in qua inest
 totius orationis
 quaedam
 quasi summa.

cisci. Quare gratiam Diis habuit suis Philippus Macedonum rex, quod filium eo potissimum tempore suscepisset, quo in magna fuit Aristoteles, propter singulare ingenium & incomparabilem doctrinam, nominis celebritate. PAVLI educatio in ea incidit tempora, quibus cum in aliis Italiae ciuitatibus, tum maxime Florentiae, Latinae, Graecaeque linguae, & omnium ingeniarum artium ac disciplinarum, magni & praeclari doctores uiguerunt. Mature publicos honores capere, & magistratus gerere fortunatum homines putant. Vixdum uirilem togam PAVLVS coeperat, cum ad Remp. accessit, & nondum exacta adolescentia in amplissimum orbis terrae collegium istud uestrum est cooptatus. Pontificatu Maximo nihil cuiquam in rebus humanis esse potest excelsius. Pontifex Max. saepe ante è comitiis exiturus creditus est, quod nemo eo dignior communi hominum opinione uideretur. Pontifex Max. creatus est, quo maxime tempore colapsam Rempub. eius unius consilio ac uirtute restitui atque erigi posse, & collegae eius omnes, & uniuerſi Reipub. principes iudicauerunt. Vita in Pontificatu tam ſeni diuturna ut maxime optanda fuerit, non fuit certe magnopere speranda: Tam multos uero annos uixit, ut ante eum quam paucissimis, & ii licet multo integriore etate creati fuerint, longior uita contigerit. Et publicas quidem res domi, forisque quam ſaluciter, quamq; omnino ita ut uoluit gesserit, ſatis est ſuis à nobis locis explicatum: In priuatis uero quid non ita ei euenit, ut melius à DEO precari ſibi neſas eſſe putare non debuerit? Quam ualde delectat florentem etate, & uirtutum indole ornatam atque inſignem honoribus ac iam

ad posteritatis certissimam spem, propagatam uidere tam illustri familie sobolem? Et sane ex illis mortalis huius uitae praemiis hoc unum est, quae piis et innocentibus pollicetur in sacrosanctae historiae monumentis *DEVS*. Vidit *PAVLVS* Nepotes duodecim: Quam eximia spe omnes, quae ex usque iam adultos, uirtute, quibus in *Remp.* meritis, à me iam ante dictum est. Vidit etiam ex Nepote, & Nepte Pronepotes, & quod in tenui etiam fortuna tam non est frequens, quam in luculenta optatissimum uidit ex *Octauio* Nepote, & *Cesaris* filia desperata per multos ante annos sobole pueros geminos. Quod si *Diagorae* *Rhodiae* uersa *Gracia* quod filios treis *Gymnicorum* *Olympiae* ludorum uictores habuisset, Quero *Metello* *Macedonico* olim *Roma*, quod à quatuor filius, praetore uno, consularibus tribus, rogo illatus fuisset, felicitatis quasi palmas detulit, At quanto hoc in

Posteri su- genere *PAVLVS* beatior? cuius nunc funeri nepotes tres colle-
perstites. ga uestri operam dant, tanto uel *Metelli*, uel *Diagorae* filiis illustriores, quanto uestra Patres dignitas atque amplitudo supra omnes alios est, atque uno tantum humanorum omnium honorum apice inferior. Absunt ex iis, qui per aetatem huic pompe interesse potuerunt, Reip. causa quinque spectata omnes uirtute, magnis clari omnes imperius. Beatissimus igitur *PAVLVS*, cuius cum summa uirtute multiplex fuit coniuncta felicitas. Fortunam hanc nos *PAULI*, si placet, appellemus; modo ut intelligamus non fuisse tam *DEO* fauorabilem *PAVLVM* futurum, nisi iam tum ab ipso nascendi initio sibi eum *DEVS* delegisset, in quem tot tantaeque res conferret, quot & quantas nemo, qui modo in
sperando

sperando esset moderatior, à caelesti numine auderet optare. Huic ego diuino fauori tam hæc quæ de felicitate nuper exposui, tribuenda iudico, quam rerum ab eo præclare gestarum prosperitatem omnem, summæ & præcellentissimæ eius uirtutis certissimum fuisse opus, iam ante demonstraui. Neque enim unquam Patres adduci potui, ut iis assentirer, qui uni uel uirtuti, uel fortune aut omnino, aut nihil prorsus humanarum rerum concederent. Nam ut multa sunt, quæ ad hominum solertiam cum eueniunt referri nullo pacto possunt, sic propemodum alia quedam euentorum genera, sibi certa recte omnia gerendi, & ingenii celeritate ac consilii magnitudine explicandi ratio ita uindicat, ut nullum in his ius, nullam potestatem sibi fortuna queat arrogare. Mihi quidem in PAULI acta intuenti, tam præclare eius uirtuti respondisse fortunam uideri solet, ut magnam utranq; & planè diuinam fuisse iudicem. Sed certio rem atque expressiorem multis partibus uirtutis prouocationem, quam fortune obsequiû. Eorum. n. quæ iam commemorari euentorum, non utiq; multa à fortuna, plurima à consilio, atque altæ cuiusdam mentis tacita quadam uis profecta, non difficillime intelliget, qui rerû omnium quam recte, quaque maxime opus fuit ratione gestarum initia, progressus, exitus perspexerit. Quod si magnus ille minime uulgaris inter Græcos sapientiæ auctor, effrenati oris, atque ex legis uecordiæ finem esse dixit calamitatem: Cur ego bene, & præclare à PAULO geste rei non multo maximam laudem perfectæ rationis, & orationis dignitati, quam sapientiam & eloquentiam dicimus, acceptam referendam putem? Nam quid tandem

hæc, cuius nomen tam sæpe homines usurpant, fortuna est? Ere-
cta sit, & sublimis ad humanos casus aut contemnendos, aut
perferendos uirtus: Fauens ac propitius iuuat DEVS, parum
certe inter hæc ubi resideat, aut dominetur, fortune loci relinqui-
tur. Cæca quædam uis ea est, quæ in iis dumtaxat, quæ provide-
ri non potuerunt, cernitur, quæque cum neque ab instanti, neq:
ab insequenti tempore nature sue accipiat ius, neque omnino sta-
tus, sed eius fuga tantummodo animaduertatur, tam nihil est, ut
quid notionis habeat, aut quid planè sit, ne illi quidem satis ex-
plicarint, qui omnibus quid rebus proprium ac suum esset, certis
comprehensum habere se finibus professi sunt. Atque hac qui-
dem, in qua de fortuna agitur parte, qualis PAVLO declaran-
de uirtutis occasio, quale se obtulit tempus? Is enim si perpetuo
secundis (quod aiunt) uentis uitæ cursum tenuisset, maximus ille
quidem, & felicissimus, ut in tempestatum tranquillitate guber-
nator haberi potuisset, sed quam sapienter ac fortiter aduersis se
casibus insuperabilem atque inuictum præbuisset, quibus ex re-
bus id opinari ac sentire possemus, signi aut exempli causa nihil
nobis reliquisset. Atenim extremus uitæ quasi actus facile de-
clarauit, non maiorem ullos temporum casus ad eius animum an-
goribus perstringendum, quam rationem ad uirtutem uehemen-
tius excitandam, uim habuisse. Nam cum exiguo temporis inter-
uallo fortuna totam domum repetitis carissimorum capitum mor-
tib. funestasset, & postremo inopinati funeris acerbissimam pla-
gam inflixisset, quam ille unquam priuati doloris significationem
dedit? quam ad primum atrocissimi luctus nuntium non grauif-
simo

Animi
magnitu-
do in ad-
uersis.

sumo philosopho nedum generosissimo, & omni fortuna maiore principe uocem misit? An non ita ad Remp. gerendam è penatibus suis prodit, ut in eius uultu omnem intestini mœoris notam eadem semper oris serenitas, eadem oculorum alacritas non aboleuerit? Quodq; magis mirabamur omnes, nulla temporum illorum iniquitas: nulla quæ à certis hominibus insolentius iacerentur minæ ac terrores, non modo inuicti animi robur neque debilitarunt, neque fregerunt, sed ne à firmissimo quidem illo, in quem semper intentam & directam mentem habuit, domesticæ ac publicæ dignitatis retinendæ atque amplificandæ statu, uel latum (quod aiunt) unguem dimouere potuerunt. Hæc fuit PAVLO in omni uitæ parte magnarum uirtutum perpetua comes felicitas. Quid uero, mortis genus quodnam optatius potuit evenire? Quodnam ad explendos omnes huius, de qua nunc loquimur, felicitatis numeros magis appositum? Cuius uitæ exitus aut claudi tranquillius, aut DEO atque hominibus potuit sanctius commendari? Vixit ille quandiu uiuere homini optabile esse debeat: atq; aliquanto etiam amplius. Integerrima uero cum adhuc mente & sensibus uteretur, diuini illius animi igniculus secundissimæ naturæ afflatu adiuuante, è corporis uinculis non concitate se proripuit, sed sine ullo uehementioris motus indicio, terrarum iam quasi pertæsum esset, ad meliorem sedem nono fere mense post secundum & octogesimum ætatis annum subuolauit. Septimus fuit dies post festas atque anniuersarias de corona sua epulas, quo uos ille solenniter atque hilare acceperat. Pridie uos illius diei affatus, uos complexus, non longiore quam quatruidui morbo fatigatus, ex

Mortis genus.

hac

hac caduca, & miserabili uita ita excessit, ut se ad superos & ad
 eum in primis, quem semper sanctissime coluerat, quemque mori-
 bunda iam lingua iteratis appellabat uocibus, IESVM CHRI-
 STVM caelestem suum, nostrumque parentem ac dominum per-
 uenisse, dubitandum nemini prorsus reliquerit. Sed ad clausulam
 in qua in- iam suam perueniat suscepta de PAVLI. III. Pont. Max.
 est de plo- uita, moribus, in Remp. atque omne omnium hominum genus me-
 ratio, con- uita, moribus, in Remp. atque omne omnium hominum genus me-
 solatio, ad ritus, operibus, actis, ipso etiam obitu, in quasdam sanè rerum sum-
 hortatio: mas coacta, longior tamen quam absolutior, commentatio. Breui-
 tatis enim immodico quodam studio percurri Patres singula non
 pertractavi: inuolui non explicavi, et plane excerpsti potius quam
 expressi. Quid enim ego unica queam oratione tam magni, tamq:
 diuini Principis laudes persequi, cum iis exornandis ac celebran-
 dis nullos futurorum annalium calamos existimem suffecturos.
 Et profecto ut neque alie uirtutes, neq: alia uel corporis, uel ani-
 mi, uel fortune, cum plura tamen multo PAVLI uitam illustra-
 rint, ornamenta prædicentur: Hæc uero ipsa, quæ tam strictim at-
 tigi, cum uestris ac totius Reip. testimoniis comprobentur atque
 agnoscantur, an non is nobis, qui tantum tam multarum, tamq:
 ingentium laudum cumulum ad Pontificatum attulerit, cum pri-
 mum Pont. Max. renunciatus est, quasi salutare quoddam nu-
 men è caelo delapsus, & ad ætatis nostræ uitia corrigenda, mise-
 rias remouendas, imminetia pericula arcenda ac propulsanda
 quasi DEI ipsius manu in terras demissus uideri potuit? Iure
 igitur tunc optatissimum & faustissimum de eius creatione mun-
 tium cum ingenti plausu exceperimus, & ad usuatas illas commu-
 ni

nis gratulationis significationes, inusitata quadam letitia exulta-
uimus & effloruimus. Et iure nunc optimo ac sanctissimo paren-
te orbat, nouo & uix ferendo ardemus dolore, luctu, squallore
prope ac marore tabescimus. Cuius enim iam nos, cum illo statim
amisso deterrima importunissima tempestatis procella nobis cœ-
perit impendere, cuius iam inquam nos consilio & auctoritate
nitemur? Cuius iniuncti animi magnitudine sustentabimur? Cuius
fide, facilitate & clementia recreabimur? Video Patres opti-
mi, uideo, & ex oris oculorumque uestrorum maestitia plane per-
spicio, ad uestram animi aegritudinem leuandam, doloremque
minuendum, eam consolationis rationem maxime obuiam & ho-
minum tacitis cogitationibus expositam, parum aut omnino ni-
hil ualere. Erat iam PAVLVS senio confectus: Quo poterat
tandem, si nunc conualuisset, longius ætatis procedere? At men-
te cum esset firmissima ac constantissima, uel unicum si superui-
xisset annu, quam præclaros eius anni fructus laturi fuisset?
Nam si improbi & nequam principis uel breuissimam uitam,
ad euerrenda perdendaque omnia nimis multum spaciū habuisse
queri populi solent, PAVLO, cuius pontificatu orbis terre sa-
lus nitabatur, cur uite quantam maxime potuit, diuturnitatem
non contigisse, non egerime feruimus? At nostra quidem ipso-
rum, Patres, causa angori nostro uenia danda est. Immortalitatem
illo huius uite, quod fas homini non esse sciebat, nunquam opta-
uit. Quæ in bonis ducuntur, reliqua ita est consecutus, ut sola ei
esset, cuius iam compotem factum nihil est quod dubitemus, cele-
stis eternitas expectanda. Beatissimus igitur ille nunc maxime.

Nos

Nos eius uirtutis ac sapientiæ præsidis orbat, iure in mærore, et iustissima deploratione uersamur. Defecit enim, ut magni illi uates, & maximarum calamitatum, ac cladum deploratores dixerent, gaudiū cordis nostri: uersus est in luctum chorus noster. Dies festi nostri conuersi sunt in lamentationem et ploratum. Sed quis tandem desiderio nostro modus reperiri, quæ consolationis ratio iniri poterit? communia illa quidem sunt Patres omnibus gentibus, & cuiusuis ordinis hominum nationibus, ac iam prope nimis uulgata. Sua causa animo angit, hominum esse ad suam uilitatem omnia referentium: Qui e uita excedant, à malis eos, à quibus futuram sibi uacationem, & perpetuam securitatem præstare non possint, abduci. Esse omnibus, qui nati sint, hoc tanquam æs alienum naturæ dissoluendum. Ferenda quæ necessario contingunt, & sua præcipue cum maturitate, æquissimo animo, non deploranda. Trita uero illa cum ciuiliū hominum sermionibus, tum in alienigenarum (ut ita dixerim) & nostratium philosophorum disputationibus: Quā mortem uulgo dicimus, iis, qui sancte, pieque uiixerunt, melioris, ac uerioris uitæ initium esse. Sed quam illud ad omnem luctus acerbicatem leniendam accommodatum, quod ille ipse, unde suum fere exorsum oratio mea habuit, Deus, & homo, ille inquam ipse, qui cunctos mortales, qui sibi fidem habuissent, mortis ut expertes essent, per mirificam illam sui corporis deuotionem effecit, claris, & auctoritatis plenissimis uocibus, eos qui nobiscum esse desierint, lugeri uetas. Diuinius ille quidem hoc, ut omnia. Nam si pro noxis æternis torquentur cruciatibus, impios luctu dignos ducere, diuinam est maiestatem ledere. Pius

uero,

uero, quos dileximus, & caros habuimus, quid sempiterna DEI beneficia, & corporum redintegrationem, quam nobis Christianæ religionis professio certam, & ratam esse iubet, inuideamus? Cælo iam Patres, cælo receptam esse PAULI mentem, pro DEI immensa clementia, proque anteactæ uitæ meritis existimamus. Intuetur igitur illinc nos è medio cælitum choro: Hunc luctum uestrum, has lachrymas superuacaneas, ac nihil omnino ad se putat pertinere. Vestro tamen eas amoris erga se, & pietati ignoscit atque indulget: Ne quoque ex hoc loco aliquid de eius laudibus agere conantem, uel per singultus potius balbutientem, sua, credo, miseratione prosequitur. Si quibus oculis in suo nuper sedentem solio contemplantur, eum nunc aspicere, si quibus auribus grauissimas eius uoces, quin uerius oracula accipiebatis, è cælo nunc missa monita auscultare possitis, nihil creditu facilius, quam iussurum eum, ut plorandi & cōquerendi primo quoque tempore finem faciatis. Satis quidem certa & expressa uestra erga se officii documenta habiturum: satis pro eo, quanti uos semper fecit, magnam sibi gratiam relaturoid: si non solum domum totum suam tueri uti cœpistis, perrexeritis, ac nepotes hosce in primis treis, quos uobis & quia poposcistis, & quia sui quam simillimos fore confidebat, collegas dedit, paterna seniores, æquales uero fraterna beneuolentia fueritis complexi. Sed multo maxime si mentem uestram, uestraq; consilia ad eas actiones conuerteritis, quæ isto uestro Reipub. principatu dignissime habeantur: Atque omnino uideritis, ne cuius à PETRO primo IESU CHRISTI legato, gubernacula uobis tradita sunt, spoliata, ut poeta

inquit,



inquit, armis, excussa magistro, deficiat naus tantis surgentibus undis: Ne scilicet repentina hac temporum perturbatione cum magno naufragii periculo uspiam impingat. Facile uero, ut opinor, hæc patres efficietis, si & PAVLI uitam æmulari nunquam deseritis, & proximis de nouo Pont. comitiis, eum PAVLO successorem mature creaueritis, qui pastor & ipse optimus ac uigilantissimus, luporum, furum ac latronum insidias arceat, commissosq; fidei, & custodiæ suæ greges non solum tueatur, sed in unicum etiam ouile congreget: Qui iure, meritoque suo uniuersæ Reip. Christianæ acceptissimus esse debeat: Qui magna cum pietate, ac religione sæcularis anni, quod nunc instat, sanctissimum lustrum celebret, suoque condant tempore: Qui postremo à PAVLI. III. uirtute ac sapientia tam prope absit, quam longe PAVLVVS ipse, & utriusque PAVLI & complurium superiorum Pontificum Maximatorum laudes & gloriam superauit.



D I X I.


Ego Frater Vincentius Bononiensis Vicarius Sanctissimæ Inquisitionis, approbo præsentem orationem dari impressioni ut catholicam.

Impressa BONONIAE in officina Ioannis Rubei.
M D L X I I I.

E R R A T A.

Pag.	7	vers.	2	eum cum	
Ibidem	In margine			Cardinalium Cardinalis	
Pag.	13	vers.	1	quidem.Sed quidem, sed	
Pag.	15	vers.	24	cius eius	
Pag.	17	vers.	17	ditionis ditionis	
Pag.	19	vers.	5	domum demum	
Ibidem		vers.	8	uero uiro	
Ibidem		vers.	16	potuerunt patuerunt	
Pag.	20	vers.	1	informari. Et iam informari, et	
Pag.	21	vers.	8	eum cum	(iam
Pag.	22	vers.	5	tenuitur tenuiter	
Ibidem		vers.	21	uistior iustior	
Ibidem		vers.	24	Si tam Si eam	
Pag.	23	vers.	11	uistius iustius	
Ibidem		vers.	18	egerrime ægerrime	
Pag.	24	vers.	4	abortis obortis	
Pag.	27	vers.	12	eum cum	
Pag.	28	vers.	7	per paucos perpaucos	
Pag.	41	vers.	17	Ecclesię: Cardines Ecclesię Car	
Pag.	46	vers.	2	fasti facti	(dines
Pag.	50	vers.	22	Epaminundam Epaminōdam	
Pag.	52	vers.	20	compræhensus compræhensas	
Pag.	59	vers.	24	agnascere agnasci	
Pag.	61	vers.	2	securitas securitas	
Pag.	65	vers.	15	nos, cum nos cum	
Pag.	66	vers.	26	poeni Poeni	
Pag.	73	vers.	3	ob hoc ab hoc	

[The page contains faint, illegible markings, possibly bleed-through from the reverse side.]



— Antoni Sacconi —